

SAN MARCOS Jaayhui'my Jadu'n Nej Jesucristo Ytun Yjajtì

¹ Jadu'n oga'ñ chondacy je oybi ayuc tiy'ajt jadu'n nej Jesucristo, je Dios y'ung ytun etz yjajtì.

² Je Dios y'ayucnajtzcaxhiybi je Isaías jecy'ajty jayhui'my jadu'n nej Dios nimay je Cristo:

Nguexaamyich ìch ngogapxy jayijp ma nidüg nidüg cajp ma müch mnicxa'ñ jac'axam, jigix jëb je cogapxy nimähuipy je jäy ajcxy co huen nayñi'ixiiyigixy ma yjot yhuinma'ñ mïd müch ycixpi, jadu'n nipaady nej jihuïy jäy ajcxy ni'ixiy tü'aa co tüg rey yjäda'ñ.

³ Nañ jadu'n jadüg it Isaías jayhui'my jada ayuc ma jadu'n yminañ:

Jim migtigüduum jäy ajcxy midoy co tüg jäy y'ayuccapxhuäcxy, jadu'n yminañ: “Nayñi'ixiiyigix ma mjot mhuinma'ñ ajcxy jaydëb naybaatim mïd ajt nHuindzin Dios. Ixmájtzcixy yi mjibicjot mjibic-huinma'ñ. Jadu'n nipaady nej jäy ajcxy yajtiy tü'aa huidibi ooy y'adijy y'a'och.”

⁴ Jim migtigüduum anajty Juan je Bautista miñ e ytigiiy mayjäy yajnibejtpi. Chi Juan capxhuäcxy Dios y'ayuc ma je mayjäy ajcxy huidibi anajty mimb nibejtp. Juan ayuc capxhuäcx co copicy co jäy ajcxy huen jothuimbíjtcixy etz ixmájtzcixy ajcxy je yjibichuinma'ñ, etz nibéjtcixy, jigix jëbi Dios yhuinmecxib ajcxy ypocy. ⁵ Tüg'óciy je

mayjäy ajcxy huídibi anajty tzinaayb jím Judea ñaaxjot etz jím Jerusalén mimb anajty ajcxy ma Juan, e y'amídooy'ijty anajty ajcxy je'y'ayuc. Co je jäy ajcxy capxpídzimy nej anajty ypocytúngixy, chí Juan yajñibejty ajcxy ma je Jordán mijñi.

⁶ Juan hue' anajty yhuít'ajtpy camello ñibiç, e nañ jëyim anajty mïid ñayhuññyí, e hue' anajty yjicx'ajtpy mu' etz uxpäg. ⁷ Juan ycapxhuäcxyp anajty Dios y'ayuc ma je mayjäy, e ymíñañ:

—Íich jayijp tí nmiñich ngapxhuäcxy Dios y'ayuc. Jac'axam minipy tüg jäy huídibi jacñigi mic'ajt mïidity ca'ydi ñich, ca' xypaadyich nicxy nguejyich yí' ycïghuin. ⁸ Íich tí nyajñibetyich miich ajcxy mïid ñi. Per je jäy huídibi yjacmïid Dios ymic'ajt, ca'ydi ñich. Yí' xyaj'adigíhuip xyajjotigíhuip Dios yjihuí'ñ ymic'ajt, jadu'n nipaadip nej jihuíy xyajñibedip mïid Dios yjihuí'ñ ymic'ajt.

Co Jesús ñibejty

⁹ Je huin'it xii huin'it tiempo Jesús chooñ ma je cajp huídibi yxii Nazaret, jím Galilea ñaaxjot, e ymiñ ma Juan el Bautista anajty yajpaady. Huin'it xii Juan yajñibejty Jesús ma je Jordán mijñi.

¹⁰ Pídzimb anajty Jesús ma je mijñi, e tim huin'ityi Jesús iix co je tzajp anajty y'ahuäch, e iix je Espíritu Santo chooñ tzajpjoty, e ycidägy ma yí'. Jadu'n je Espíritu Santo yquëxígy anajty nej tüg muuxy.

¹¹ Chí Jesús midooy capxy ayuc choñ tzajpjoty, ñimäyíi:

—Íich miich n'ung'ajtpy. Ooy ñich miich ndzocy njihuíy. Ooy jotcuyc najjihuíyíijich mïid miich.

Je mujcu' tuñ ijxta'ni ma Jesús

¹² Huin'it mic'amy je Espíritu Santo yajnicxy Jesús mǎjtǎgǎduum. ¹³ E hue' Jesús yhui'miy jim mǎjtǎgǎduum huixchǎguǎpx xǎi ahua'n iyujc agujc. Huin'it je mujcu' jot'ijxy yhuinma'ñ'ijxy je Jesús. Chi je ángeles ajcxy miñ ypubejty ypuǎgǎiy je Jesús.

Jesús ytungyajtzondägy jim Galilea

¹⁴ Ti anajty Juan yajpidägy pujxtǎgoty, jac'axam Jesús ñicxy jim Galilea. Jim Galilea Jesús capx-huäcxy Dios y'ayuc etz yi Dios y'ané'min. ¹⁵ Jesús yminañ:

—Ti je xǎi je tiempo yhuaad'ajtni. Ti nigoody je xǎi je tiempo mina Dios pidäga'ñ yi' y'ané'min ya naaxhuiñ. Jothuimbijtcix ajcxy, etz ixmajtzcix ajcxy mjǎbicjot mjǎbic-huinma'ñ. Mǎbiccix Dios y'ayuc jadu'n nej jǎb ajcxy m'alma ñǎdzögǎpy.

Jesús huodzoñ mǎdaax jäy huiǎibi anajty acx-majtzp

¹⁶ Jesús huiǎijtp anajty ma je mejypa' huiǎib yxǎi Galilea mejy, co oy'ijxpaady Simón etz y'uch Andrés. Simón etz Andrés acxmadziñ anajty ytung'ajtpy, ytimpidacpy anajty y'acxmadzi'ñ mejyjoty co ajcxy Jesús ijxpaty. ¹⁷ Chi Jesús nimay Simón etz Andrés:

—Min müǎd ñich. ñich müǎch ajcxy huingbi tung nmöhuǎpy. Jadu'n mdung nipaadǎp nej jǎhuǎy mjǎymǎjtzcixǎpy.

¹⁸ Mic'amy Simón etz Andrés ajcxy ixmajch y'acxmadzi'ñ, e ñicxy ajcxy müǎd Jesús.

¹⁹ Chi Jesús yjacyöy anajty hueen, e ijxpaty Jacobo etz y'uch Juan, je Zebedeo ajcxy ymang. Je

Jacobo etz Juan tumb anajty barcojoty. Hue' anajty ajcxy yaj'oyiib je' y'acxmadzi'ñ. ²⁰ Chi Jesús mijhuooy ajcxy Jacobo etz Juan, e nimay co huen nicxy miiid yi'. Mic'amy je' ajcxy ixmajch yteedy, je Zebedeo, barcojoty miiid ytumbi, chi ajcxy ñicxy miiid Jesús.

Tüg jäy huidibi anajty jibic espíritu miiid

²¹ Huin'it Jesús miiid ymigügtijc yja'ty jim Capernaum. Je huin'it sábado, je pooxín xii, Jesús ytigiiy ma je judíojäy ajcxy ñaymujctac jim Capernaum, chi yjäy yaj'ixpijctzondacy. ²² Je mayjäy ooy ajcxy jihuiy huinmay je ayuc huidibi Jesús anajty ajcxy yaj'ixpijcp. Com Jesús hue' anajty yaj'ixpijcy jadu'n nej jihuiy yci'm'ané'min miiidity. Ca' Jesús anajty yaj'ixpijcy jadu'n nej je jäy ajcxy huidibi yaj'ixpijcp anajty Moisés ycötújcín je jécycp. ²³ E ma je naymujctac tüg yëydijc huidibi miiid anajty ca'oybi. Chi je ca'oybi ooy mic ycapxcoody, e yminañ:

²⁴ —¿Ti co xy'amayiy iich ajcxy, Jesús huidibi tzomb jim Nazaret? ¿Nej ti mmiñ co xyajhuindigoyáangixyichi? Iich n'ijxajpy miich, e nejhuuuybich co miich je' je Huätzpi Dios.

²⁵ Chi Jesús ix'ojoy je ca'oybi, e nimay:

—Amon miich, e pidzim ma jada yëydijc.

²⁶ Huin'it je ca'oybi yajyajch yajquidy je yëydijc, e mic yaaxqueegy, e ypidzimy ma je yëydijc.

²⁷ Tüg'ócay je mayjäy jiiiby ma je naymujctac ooy ajcxy ñay'adzigiyyi, e ñayñimaayi ajcxy miñ xyipy:

—¿Ti jada' yi'? Jada yëydijc ymiiid jemybi ixpijcin. Yi' miiid mic'ajt etz ane'm'ajt, paady ycixpi yi' ane'my yi' ca'oybi, e ycapxmidoohuip.

28 Míc'amy je mayjäy ajcxy huídijaty tzinaayb ma tüg tüg cajp jim Galilea nejhuíy ajcxy nej Jesús ytuñ, e cōmaaygíxy Jesús.

Jesús yajtzögy Simón Pedro ymíd töxyjäybi

29 Tim huin'ítíy Jesús ypidzimy ma je naymujctac, chi ñícxy mïd Jacobo etz Juan jim ma Simón etz Andrés ytíjc. 30 Simón ymíd töxyjäybi píjçip anajty. Cíjx'am anajty y'ity, e míc anajty ooy ytoyíi. Tim huin'ítíyí Jesús ñímaayí co Simón ymíd ooy míc ypiyíi. 31 Chi Jesús nimíjhuägy je pa'mjäy. Chi majtzi yci', e huijtzígy. Tim huin'ítíy yí toyíi y'ixmajtzi, e chi yajcay yaj'uucy Jesús etz ymígügtíjc.

Jesús yajtzögy may pa'mjäy

32 Co xíi oy ycidacni, e chuu'íyñi, chi je mayjäy mïd miñ ajcxy ma Jesús tüg'óciy pa'mjäydíjc, etz huídijaty ajcxy ca'oybi ymïd. 33 Tüg'óciy je mayjäy ajcxy ma je jimbi mij cajp nimujcy je tíjc ma Jesús anajty ti yjättägy. 34 Jesús yajtzoctay tüg'óciy je may pa'mjäy huenytímytiibá'mítíy, etz yajpidzimy may ca'oybi majaty jäy ajcxy. Per Jesús ca' anajty a'ixíy nicxy je ca'oybi ñigapxyíi, com y'ixy'ajttaayb anajty ajcxy Jesús.

Jesús y'ayuc tíy'ajt capxhuäcxy jim Galilea

35 Tim mooñi Jesús ymaybídígy, ca' anajty yximíyñi, e ypidzimy ma je cajp. Chi ñícxy ma tüg mijtígíduum Dios mibíjctzoobi. 36 Huin'it je Simón etz je ymígügtíjc ooy ajcxy ja'íjxtäy Jesús. 37 Co ajcxy paty je Jesús, chi ajcxy nimay:

—Tüg'óciy je mayjäy xyjadim'ixtäy.

38 Chi Jesús nimay Simón etz je ymígügtíjc ajcxy:

—Tzoc ajt jámim ma yí jacjadyii cajp huinduy agonbi, jaydéb ngapxhuäcxibich Dios y'ayuc nañ jadu'n ma yí jáy ajcxy jim. Paady ycixpi ndzooñich tzajpjoty, jigix jëbi ngapxhuäcxibich Dios y'ayuc.

³⁹ Jesús nicxp anajty ma nidüg nidüg cajp jim Galilea ycapxhuäcx anajty Dios y'ayuc ma nidüg nidüg judíojäy ñaymujctac, e yajpidzimy anajty ca'oybi majaty jäy.

Jesús yajtzögy tüg jáy nübützpa'mmüdpí

⁴⁰ Tüg jáy huidibi ymüid anajty jibic pützpa'm, je micpi, chi nimijhuägy Jesús, e ycojxtinay'ahuüy ma Jesús yhuinduu, ymínañ:

—Pen miich jadu'n tzojcpy, jëb xyajtzögich.

⁴¹ Chi Jesús pa'ayoy je pa'mjäy, e pidacy yci' ma je pa'mjäy ñinicx, e ymínañ:

—Ndzojcpyich, cham nyajtzögy.

⁴² Co Jesús jadu'n ymínañ, chi mic'amy je jáy huidibi anajty müid je jibic püdz chögy.

⁴³⁻⁴⁴ Mic'amy Jesús ycapxcíjxy müid je jáy huidibi anajty ti chögy, e nimay:

—Ix pin myajnimäy co ti mdzögy. Nicx jayijp jüby ma Dios ytijc ma je judío teedy ajcxy, e mo' Dios yhuindzigí'ñ jadu'n nej Moisés ycötújcín ane'my, jigix jëbi huädz mbidzimipy ma Dios ycötújcín. Cuydun miich huidibi Moisés ñajtz'ane'müy jecy'ajty, jigix jëbi je mayjäy ajcxy nejhuühuip co ti mdzögy.

⁴⁵ Per je yëdiyc ca' capxymídoy Jesús. Co ñicxy, chi ytigüy capxy yajyöybi jadu'n nej anajty ti yajtzögyii. Com je mayjäy nejhuüyb huidibi anajty Jesús ti tuñ, paady ycixpi Jesús ca' anajty ocjajtni nej ytigühuipy ijxna' jigüe'xna' majaty cajp.

Hue' anajty huıdity ma ca' pın chinäy. Per miñ anajty y'oy'ixyii huenytımpınjäyıtı, chooñ ma nidüg'ócıy cajp huınduy agonbi.

2

Jesús yajtzögy tüg jäy cıma'tpı tecyma'tpı

¹ Tı anajty xii tiempo ñajtznıncxııyñi co Jesús yhuimbijty jadüg'oc jım Capernaum. Je mayjäy ñejhuıyb anajty co Jesús yajpaady ma tüg tijc. ² Chi mic'amy mayjäy ñayyöymujcı ma anajty Jesús yajpaady, e ca' anajty tigıydac ma je tijc, miıd co tzach mayjäy anajty ti miıngıxy. Y'adujctaayb anajty ajcxy je tijc'aguu. E Jesús ycapxhua'xyp anajty Dios y'ayuc. ³ Huin'it xii, midaax yeydıjc cıymiñ cıjx'am ma Jesús yajpaady tüg pa'mjäy huıdibi ycı' ytecy ti yxujxtäy anajty. ⁴ E com ca' anajty ni nej y'oyıy nej yajjädıp ajcxy ma Jesús je pa'mjäy, je' co anajty chach újtızıty je tijc miıd je mayjäy, chi ajcxy yajcöhuaach hueeni je tijcñıcx ma anajty Jesús yajpaady. Chi ajcxy cödıyñajxy je pa'mjäy cıjx'am. ⁵ Co Jesús ijxy je jäy ajcxy ymıbíjcin, chi nımay je pa'mjäy:

—Mıgügıch, yı mbocy ti yajhuinmecxtäy.

⁶ Per nijėjıty huındzındıjc huıdibi ajcxy nijaydutp anajty Dios ñecy co ajcxy mıdoy nej Jesús ymına'ñ, chi ajcxy ymına'ñ jotjoty huınma'ñyoty: ⁷ “¿Nej co jada jäy jadu'n ymına'ñ co ti yajhuinmecxy jada pa'mjäy ypocy? Capxtıgooyb yı' miıd Dios. Com ca' nıpınjäy jėb ypocyhuinmecxy. Tügpaıc Dios yı' huıdibi jėb ypocyhuinmecxy.” ⁸ Per Jesús ñejhuıyb anajty nej je' ajcxy chachmına'ñ jotjoty huınma'ñyoty, paady mic'amy ymına'ñ:

—¿Na'amy co mdzachhuinmaaygixy? ⁹ ¿Huidibi jada jac'ooy co nnimäyich yi pa'mjäy: “Ti mbocy yajhuinmecxytäyi.” O jac'ooy co nnimähuibich: “Pidig, e yajpidig yi mdögy, e tüyöy?” Tú'ciy yi'.

¹⁰ Chi Jesús yjacmīnañ:

—Jadachambi janchtiy nyajquëxigañich co ñich, je jäy huidib tzoon tzajpjoty, e huidibi cham yajpaady ya naaxhuiñ, nmīdich mic'ajt jaydëb nhuinmecxyich jäy ypocy.

Co Jesús jadu'n ymīnañ, chi nīmay je pa'mjäy huidibi yci' ytecy anajty xuxy:

¹¹ —Ñich miich yam jadu'n nīmäy: “Tinayig, yajpidig yi mmabejt e nicx ma mdijc.”

¹² E mic'amy je pa'mjäy ypidigy, e yajpidigy ymabejt, chi ytüyöychoñ jiiby ma je mayjäy ajcxy anajty y'ixy yhuindicxy. Paady ycixpi tüg'ócīy je mayjäy ooy jihuīy huinmay etz jäymejch ojadajty ajcxy Dios, ymīnaangixy:

—Nimīnaabi ajt jadu'n nga'íjxim mijhuinmañ jadu'n nej cham ti n'íjxim.

Jesús nīmay je Leví: “Pajamgich”

¹³ Chi jadüg'oc Jesús ycajppidzīmy, ñicxy jim ma mejypa'. E co mayjäy ñayöymujcy jim ma Jesús anajty yajpaady, chi Jesús yaj'ixpijc je mayjäy. ¹⁴ Co Jesús yjactüyöy anajty, chi ijxpaady Leví je Alfeo ymang. E Leví ñāayb anajty ma je yajcogüejttac jäy yajcogüejtp anajty. Chi Jesús nīmay Leví:

—Pajamgich.

Tim huin'ítīy Leví ytīnayīgy, ixmajch ytung, e panīcxy Jesús.

15 Jadu'n yjajti co tüg xi Jesús caayb anajty me Leví ytijc. Mayjäy huidibi ytung'ajtpy anajty yajcogüedi, etz jacjadyii jäy huidibi anajty tundigooyb müid judío jäy ycostumbre y'iñaaygixy ma je caydac quipxy müid Jesús etz je' ydiscípulos ajcxy. Com may jäy anajty ooy Jesús tzach müid huidíjtcixy. 16 Jim anajty ma Leví ytijc nijëjity fariseojäy, je huindzindijc huidibi tzach padumb judíojäy ycostumbre. E co je' ajcxy ijxy co Jesús caayb uucp anajty tüg mucy müid tüg'ócixy je mayjäy ajcxy huidibi tundigooyb müid judíojäy ytiy'ajt ycötújcin, etz yajcogüejtpidijc, chi ajcxy migapxy Jesús ydiscípulos, je' ajcxy huidibi mijnicxpejtp anajty Jesús, nimay ajcxy:

—¿Nej co Jesús miich ajcxy mHuindzin ycaymucy y'ucmucy müid yi yajcogüejtpidijc ajcxy, etz jacjadyii jäy ajcxy huidibi tundigooyb müid judíojäy ycötújcin?

17 Co Jesús jadu'n midoy nej je fariseo jäy nigapxyii, chi ajcxy nimay:

—Ca' tzocy tzozdumbi yi jäy ajcxy huidibi mic'ajtp oy'ajtp. Yi' janchtiy yi huidibi ajcxy yuuba'm ymüid chojcpy ajcxy tzozdumbi. Nañ tim jadu'n yi jäy ajcxy huidibi ca' ypocymüidity, ca' ajcxy tzocy pocyhuinmeecxin. Hich ti nmiñich co nyajjothuimbidipyich pocyjäydijc. Hich ca' ti nmiñich co nyajjothuimbidipyich oyjäydijc tudägyjäydijc.

Jesús yaj'amidoogixy nej co jäy y'ity jaygay

18 Jadu'n yjajti tüg tiempo ayuu'ijtp anajty je jäy ajcxy huidibi mijnicxpejtp anajty Juan je Bautista.

Nañ jadu'n ayuu'ajtp anajty je fariseojäy ajcxy. Chi nijëjity ajcxy ymiñ ma Jesús e amidoy:

—¿Nej co yi jäy ajcxy huídibi mijnicxpejtp ajcxy Juan etz nañ jadu'n yi fariseojäy ajcxy ayuu'ajtp ajcxy, e je jäy ajcxy huídibi miich xymijnicxpejtp, ca' y'ayuu'ájtcixy?

¹⁹ Chi Jesús y'adzooy:

—Co ya nyajpaadyich ya naaxhuiñ, ca' ycopicity co ich ndiscípulos ajcxy y'ayuu'adip. Jadu'n nipaady nej jäy ajcxy huídibi píjcin nixidumy ca' ajcxy y'ayuu'aty ma yam yi píjcin nixiduñ, e peni ca'ni je píjcpí ymígügtijc y'ixmajztäyíi. Nami je píjcpí ca'ni choñ, chi ca' pin y'ayuu'adañ huídibi nixidum je píjcin. ²⁰ E paadip je xii je tiempo mina ca' nmí'd'ida'ñich ya naaxhuiñ yi' huídibi ajcxy xymijnicxpejtpich, e huin'it ajcxy y'ayuu'adaangixy.

²¹ Com jemybi Dios y'ayuc nyaj'ixpijpyich, paady ca' ytügyí miid je jécyip ayuc huídibi je fariseo jäy ajcxy yaj'ixpijpy. Jadu'n nej miich ajcxy mnejhuíy co ni pin ca' agiyíy tuc huit miid tüg pedaaas jemy huit, con je' co je jemy huit nimujcp je', e chi nígi najtzcídzihuip je tuc huit.

²² E nañ ni pin ca' jëb huaad pidägy jemy vino ma tuc cochac. Je' co je vino jemybi ycídzamy je tuc cochac, e chi y'ixyojctähuip je vino etz je cochac ñitigoydähuip. Hue' janchtiy jëb ajcxy pidacy jemy vino ma jemy cochac.

Je discípulos ajcxy yajmújcixy je moc cojc sábado xii

²³ Tüg sábado xii Jesús miid ydiscípulos ajcxy ñaxiiy ma tüg trigo cam. E huin'ítíyí je ydiscípulos

ajcxy ytiḡiy je trigo tujcp. ²⁴ Co je fariseo jāy ajcxy ijxy jadu'n nej Jesús ydiscípulos ajcxy anajty tujcmujc trigo tūm, chi ajcxy nimay Jesús:

—Ix miich. ¿Na'amy co miich mdiscípulos túngixy huídibi judío ycötújcín capx'adujcpy sábado xii?

²⁵ Per Jesús yminañ:

—¿Nej ca'miich ajcxy mguendtuñ Dios y'ayuc co mnecycapxy, jadu'n nej David ytuñ tūgtecy jecy'ajty, co David etz ymīgūgtijc yuu'ōgaangixy anajty? ²⁶ Je huin'it tiempo jecy'ajty co je judío teedy Abiatar mijtungmīdipi anajty ma Dios ytijc, chi David ytiḡiy ma Dios ytijc, e caay je tzajcaagy huídibi ti anajty yoxy ma Dios yhuinduu. Dios ycötújcín yminañ co je teedy ajcxy ycaagy'ajtpy jada tzajcaagy, ca' jac'ooyñipin. Nañ jadu'n David moy je tzajcaagy je jāy huídib anajty ajcxy ymīd.

²⁷ Nañ jadu'n Jesús yjacminañ:

—Iich, je jāy huídibi tzoon tzajpjoty, nmīdich ané'min, jaydēb nimāyich je jāy ajcxy ti jēb túngixy sábado xii. ²⁸ Com Dios ti ixmach je sábado xii, paady ycixpi, iich je jāy huídibi tzoon tzajpjoty, nmīdich ané'min jaydēb nimayich jāy ajcxy co jēb tijaty tuñ sábado xii.

3

Je yēdyjc huídibi anajty yci' tīdzip

¹ Jesús ytiḡiy jadūg'oc ma je judío naymujctac. Jiiby anajty tūg yēdyjc huídibi anajty ymīd tūg yci' tīt. ² Je fariseojāy jiiby ma je naymujctac y'ijx'ijtpy anajty Jesús, co anajty nejhuīhua'ñ pen Jesús yajtzōgamy je pa'mjāy sábado xii, jigix jēbi ajcxy xīhuip Jesús co ti ytundigoy mīd judío jāy

ycötújcín. ³ Jesús nımay je jäy huıdibi mııd tüg yci' tıtz:

—Pidıg, min ya ma ıch.

⁴ Huın'ıt Jesús y'amıdoy je jäy ajcxy e nımay:

—¿Nej mııch ajcxy mınaangıxy: Nej jėbi jada nduñich je oybi o je jıbıcpı sábadı xıjoty? ¿Jėbi nyajtzögıch jäy o jėbi nyajtıgoyıch jugy'ájın?

Per je jäy amıñ ajcxy ıjty, ca' ajcxy je' y'adzooy.

⁵ Huın'ıt Jesús huındıcxpejty je jäy ajcxy mııd chip y'ahua'n, e mııd jotmay, je' co ooy ajcxy jotjuuñıty, e chi nımay je yėydıjc:

—Xajtıu yı mgı'.

Chi je yėydıjc xajtıy yci', e chi yci' oy chögy. ⁶ Chi je fariseojäy ypıdzımday ma je naymujtac, ooy yjotmädy ajcxy, e ñıcxıy ajcxy ñaymújcpı mııd je jadügpıcy judıo huındzındıjc huıdibi ymıjnıcxpejt je rey Herodes. Huınma'ñ ıxtaayb anajty ajcxy nej jėb ocıaj'ögıp Jesús.

Mayjäy ma tüg nıba'

⁷ Per Jesús choon mııd yı' ydiscıpusos ajcxy, ñıcxıy ma mejypa'. E ooy mayjäy huıdibi ajcxy tzomb Galilea ñaaxjot etz Judea ñaaxjot panıcxıy ajcxy Jesús. ⁸ Nañ jadu'n mayjäy panıcxıy ajcxy Jesús huıdibi ajcxy tzomb jım Jerusalén, huıdibi ajcxy tzomb jım Idumea ñaaxjot, huıdibi ajcxy tzomb jım Jordán mıjnı nınaxıy ma xıı ypıdzımyb, huıdibi ajcxy tzomb jım Tiro etz Sidón ñaaxjot. Ñıcxıtäy je mayjäy ma Jesús yajpaady, com ñejhuııyb anajty ajcxy je mıjhuınma'ñ huıdibi Jesús anajty ytumyb. ⁹ Com tzach mayjäy anajty ymııngıxy, paady Jesús nı'ane'mdıy ma yı' ydiscıpusos ajcxy tüg barco ma jėb ıñäy, ca'ty je mayjäy ooy y'adıjıyıı

y'agodÿyii. ¹⁰ Com Jesús ti anajty yajtzögy may jäy, paady ycixpi tüg'óciy je pa'mjäy nimujcy Jesús, adzip tzachnidonaangixy. ¹¹ Co je jäy ajcxy huídibi ca'oybi ymüd ijxpaty Jesús, chi ajcxy ñayhuijojtaci ma Jesús yhuinduu, e mic ycapx-cooty, yminaangixy:

—Miich je' Dios y'ung.

¹² Per Jesús nimay mictägy je ca'oybi ajcxy co ca' huaad nigapxcixy nimiydaaccixy pin je' anajty.

Jesús huin'ixy majmetzpi discípulos

¹³ Huin'it Jesús ypejty ma tüg cögop, e capxyñiguexy co huen miñ ma yi' je ymigügtijc huídibi yhuin'ixamy co ytunam müd yi'. Chi ajcxy ymiñ ma Jesús. ¹⁴ Chi Jesús yhuin'ijx majmetz ajcxy huídibi ymüd'idamy, e huídibi yquexamy y'ayuccapxhuäcxp. ¹⁵ Jesús moy je majmetzpi discípulos ajcxy huídibi anajty ti yhuin'ixy mic'ajt jaydëb yajtzögip pa'mjäy ajcxy, e ymoy ajcxy ymic'ajt jaydëb ca'oybi yajpidzimy ma jäy ajcxy. ¹⁶⁻¹⁷ Jada je nimajmetzpi discípulos ajcxy yxü nidüg nidüg: Simón, je huídibi Jesús yxü moy Pedro; Jacobo müd y'uch Juan, yi Zebedeo y'ung y'anäg, je huídibi ajcxy Jesús yxü moy Boanerges (je ayuc Boanerges jadu'n yhuimbizimy: “Enee ymang”). ¹⁸ E jacjadyii huídib Jesús ti anajty huin'ixy: Andrés; Felipe; Bartolomé; Mateo; Tomás; Jacobo je huídibi Alfeo ymang'ajtpy; Tadeo; e je jadügpí Simón, je cananista. ¹⁹ Nañ jadu'n Jesús huin'ijxy Judas Iscariote, je huídibi agojix cÿeyc Jesús ma ymidzip.

Yajnibjccixy Jesús co müdity mujcu' ymic'ajt

(Co jadu'n huin'ijxtaay je majcmetzpi discípulos ajcxy), Jesús ytiǵiŷy ma tũgtiŷc mĩd y' ajcxy. ²⁰ Huin'ĩtiy tzach mayjãy ñayyöymúŷcigixy ma je tiŷc ma Jesús y'ity, ixti Jesús etz ymiǵũgtiŷc ca' y'oyĩy nej jẽb ycaaygixy y'uuccixy. ²¹ Co Jesús y'amigũgtiŷc jadu'n nejhuĩy, chi ajcxy nimiiñ Jesús yajniŷxaangixy anajty mach, com hue' anajty tiŷcixy co Jesús ylociib.

²² Nijẽjĩty escribas ajcxy, je huindzĩndiŷc huĩdibi niŷjaydutr anajty Dios ñecy, miin ma Jesús co choñ ajcxy Jesusalén, ymĩnaangixy:

—Jada Jesús ymĩd Beelzebú, je ca'oybi yhuindzin, ma y'aa yjot. E y' yajpidziŷmy je ca'oybi ajcxy ma jãy ajcxy yjothuinma'ñ mĩd Beelzebú ymic'ajt.

²³ Chi Jesús huoomiñ ma y' je escribas ajcxy, e yajmĩdmiydacy ajcxy tũg jihuimbit ayuc. Chi Jesús ymĩnañ:

—¿Nej tiy'ajt jada nej miich ajcxy mĩna'ñ co Satanás jẽb ci'm ñayyajpidziŷmyii ma jãy ajcxy y'aa yjot? Ca' tiy'ajt nej miich ajcxy mĩna'ñ. ²⁴ Pen tũgpicy tungmĩdpi ixipy ñaybiŷc-huá'cxigixy, etz ñaymĩdziptzoonigixy ixipy ac jẽyi. Pues cixip y' ajcxy y'ané'min. ²⁵ Nañ jadu'n pen tũgpicy tũg juugy tũg miǵũg ixipy ñaybiŷc-huá'cxigixy, ca' ajcxy y'idaangixy tũgmucy. ²⁶ Nañ jadu'n pen Satanás ixipy ti ñaybiŷc-huãxyii, e ci'm ixipy ti nayñibidĩgyii, ca' ixipy y' ymic'ajt ida'ñ. Hue' janchtiy Satanás cixipy tiŷoyipy. (Paady ca'tiy'ájtity nej miich ajcxy ymĩnañ.) ²⁷ Ca' ni pin jẽb huaad ytiǵihuĩp ma tũg miŷcpi jãy ytiŷc etz meedziŷpy tijaty ymĩd, pen ca' jayĩp cixoch tecyxoch je jãy miŷcpi.

Pen ti c̄ixoch tecyxoch ixyipy je mic̄jäy, huin'it janchtiy mimadägipy, e píjçip tijaty ym̄id.

²⁸ Janch ñich miich ajcxy nimäy co Dios jëb huinmeecxip tüg'óciy pocy huidibi jäy ytúngixp etz tüg'óciy jibicpi huidibi jäy ycapxp. ²⁹ Jëyi janchtiy co pinjaty capxtigooyb m̄id je Espíritu Santo, je Dios yjihu'iñ ymic'ajt, ca' Dios huinmecxi nimina. Huinixi y'idañ pocym̄id.

³⁰ M̄id co jäy ajcxy chach ym̄inaangixy co Jesús anajty m̄idity ca'oybi, paady Jesús jadu'n ym̄inañ.

Jesús ytaj etz y'uch miguëxy ajcxy

³¹ Jesús ytaj etz y'uch ajcxy oy yja'ty ma anajty Jesús yajpaady. Chi Jesús ytaj etz y'uch ajcxy anajty ytinaaygixy t̄iba'y, e chi ajcxy capxñiguejxy Jesús. ³² Je mayjäy huidibi anajty ajcxy iñaayb jühuiditi ma Jesús, ym̄inañ ajcxy:

—Miich ndaj etz m'uch cheeby ajcxy t̄iba'y mi-ich ixtaayb.

³³ Chi Jesús ym̄inañ:

—¿Pinjäy miich ajcxy mdijy co ñich ndaj'adyii etz ñich n'uch'adyii?

³⁴ Huin'it Jesús huindicxpejty je jäy ajcxy huidibi anajty iñaayb ajcxy jühuidity ma je', e ym̄inañ:

—Tüg'óciy jada jäy ya jadu'n ajcxy nipaady nej ñich ndaj etz ñich n'uch. ³⁵ Huenytimypinity huidibi ajcxy cuydumb yi Dios chójcin, yi' je' jadu'n nipaady nej ñich n'uch, ñich n'ajch, ñich ndzi' etz ñich ndaj.

4

Je niipi y'ixpejt

¹ Jadüg'oc Jesús ytiḡiḡy yaj'ixpijcpḡ ma mejypa'. E ooy mayjäy ymujcpejty ma anajty Jesús yajpaady. Miid co ooy anajty chachmayjäyity, paady Jesús ytiḡiḡy ma tüḡ barco jahuengḡ mejyjoty. Jesús iñaayb anajty barcojoty, e je mayjäy iñaayb anajty ajcxy ma mejypa'. ² Huin'it Jesús yaj'ixpijcy je mayjäy miid canaag jihuimbit ayuc. Co yaj'ixpijcy, chi ymiñañ:

³ —Amidoo'ijtcix miich ajcxy ḡch jada n'ayuc. Tüḡ jäy chooñ niipi. ⁴ Co je niipi yhuijpy anajty trigo tḡm, chi je trigo tḡm nijējity ooycäy tim tüḡujc. Chi je joon ajcxy ymiñ jicxy je trigo tḡm huiḡibi tüḡujc ti ycäy. ⁵⁻⁶ E nijējity trigo tḡm oycäy ma tza-anḡcx, ma nihueeñ oyñaax yajpaady. E je trigo tḡm ca' tzip mujx je', je'co ca'anajty ooy naax mápxity. E co je xiḡ ypidzimy, chi no'cy je trigo mang, com ca' anajty ytictz miidity naaxjoty, chi ytḡch. ⁷ E nijējity trigo tḡm oycäy ma apyjot. Co jada trigo tḡm ymujxy, chi y'ujtz'ögtäy je trigo mang, e ca' ytḡm'ajty. ⁸ Per jacjadyii trigo tḡm oycäy ma oyñaax, chi ymujxy, e ytḡm'ajt may'amy: tüḡ pi'c pajc iipxmajc oyco'ity, jadüg pi'c pajc tugi'px oyco'ity, jadüg pi'c pajc miḡo'px oyco'ity.

⁹ Co Jesús je miydäḡiḡ yajmay, chi ymiñañ:

—Pinjaty miid ytätzac, pin midohuamy, huen mido'mbicy jada ayuc.

Ti yi' ñiḡapxyp yi ijxpejt

¹⁰ Co je mayjäy ḡicxni, e Jesús yhui'my naydüḡ, chi je nimajmetzpi ydiscípulos ajcxy etz jacjadyii huiḡib miñicxpejt Jesús ñimijhua'cy, e amidoy nej yhuimbidzimy je jihuimbit ayuc. ¹¹ E Jesús ymiñañ:

—Miich ajcxy jaydëb mnejhuïhuïpy huïdibi Dios ñigapxpy ñimiydacpy coyüch'amy ma y'ané'min ycötújcin. Jacjadyii jáy ajcxy jihuimbit'amy nyajmïdmïydaacyich. ¹² Jadu'n jihuimbit'amy nyaj'ixpijcpyich je mayjäy, jaydëb co pinjaty ijxp, ca' ajcxy ixipy; etz pinjaty midoob, ca' ajcxy mido'mbigipy. E jadu'n ca' ajcxy yjothuimbidip, e nañ ni ycayajmeecxipy ajcxy ypocy.

Jesús najtzcapxiy nej yhuimbïdzïmy je niipi y'ijxpejt

¹³ Chi Jesús yjacmïnañ:

—¿Nej ca' miich ajcxy mhujnjïhuïy jada jihuimbit ayuc? Pen ca' miich ajcxy mhujnjïhuïy jada jihuimbit ayuc, ca' miich ajcxy mhujnjïhuïy yï jacjadyii jihuimbit ayuc. ¹⁴ Je huïdibi capxhuäcxp Dios y'ayuc, jadu'n yï nipaady nej je huïdibi niip trigo tïm. ¹⁵ Je jáy ajcxy huïdibi amidoo'ijtp Dios y'ayuc, e mic'amy je ca'oybi yajpïdzïmy Dios y'ayuc ma ajcxy yjot yhuinma'ñ, jadu'n ajcxy nipaady nej trigo tïm huïdibi cäb tüguc, e je joon ajcxy mic'amy piimujctay. ¹⁶⁻¹⁷ Je jáy ajcxy huïdibi amidoo'ijtp Dios y'ayuc janch jotcujc, e mïbíjccixy tzojccix, chi ajcxy ixmajtzi Dios y'ayuc co agapxiyb paady, e co tzaachypi minaxy yajnaxy mïd Dios y'ayuc ycixpi. Jadu'n ajcxy nipaady nej je trigo tïm huïdibi ti ycäy ma tzaanïcx. ¹⁸⁻¹⁹ Je jáy ajcxy huïdibi amidoo'ijtp Dios y'ayuc, e co ñïcxni, chi jäydgoooyñi Dios y'ayuc mïd jotcujc'ájtïn tzïnaayïn, etz comeeñ'ájtïn etz adzójcin. Jadu'n ajcxy nipaady nej trigo tïm huïdibi ti ycäy ujtzjoty, e ca' ytiim'aty mïd co oy y'ujtz'ögy. ²⁰ Je jáy ajcxy huïdibi amidoo'ijtp etz

cöbìjcp Dios y'ayuc amumdügiot etz Dios y'ayuc tumb ma ajcxy yjot yhuinmañ, jadu'n ajcxy nipaady nej je trigo tìim huìdibi ti càb ma oyñaax etz ytìim'aty may'amy: tüg pi'cpajc iipxmajc, etz jadüg pi'cpajc tugì'px, etz jadüg pi'cpajc mìgo'px.

Je lámpara ñi'ijxpejt

²¹ Chi Jesús yjacmìnañ:

—Co jáy ajcxy jìndicxi'ñ nòctzoy, chi canan ajcxy cöjupy mìd tu'tz, ni ca' ajcxy pìdacy cijxpa'tci'py, hue' janchtiy pìdaaccìxy ma jìndicxpejt jaydèb mìj ytìxcy. ²² E nañ ni ca' ni pìn ni ti jèb ameech tunìpy, e nìcxy ycayajnejhuìy. E ca' ni pìn ni ti ayüch tunìpy, e nìcxy ycayajnejhuìy. ²³ Pìnjaty ytàzac ymìd, pìn mìdoohuamb, huen mìdo'mbìjccìxy ìch n'ayuc.

²⁴ Nañ jadu'n Jesús ymìnañ:

—Cuendtúngìx jada ayuc huìdibi mìich ajcxy yam mmìdooyb. Yì quipxi'ñ huìdibi ajcxy myajquipxìyb, nañ jadu'n yì' mìd Dios ajcxy xyquipxyhuìmbidìpy, e ixtì jacyajmòhuìp ajcxy huìdijaty mìdoob ìch n'ayuc. ²⁵ Pìnjaty ymìd, yajmòhuìp nìgi, pìnjaty hueen mìd, yajpìgìpy nìgi (oy ixyipy hueen jadìm mìdìty).

Je tìim huìdibi yeecp ñi'ijxpejt

²⁶ Nañ jadu'n Jesús ymìnañ:

—Yì Dios y'ané'mìn jadu'n yì' nej co tüg jáy nìcxy ñìpy ma ycamjot. ²⁷ Chi jada' co ñìiptay ñìcxni ma ytìjc e ymì'o'cni ymàybidìgnì com jabom, e jadu'n yajnaxy canaag xì tzuu. E je moc pajc mujxp je' etz yomb. Per je cogam ni ca' nejhuìy nej je moc yoñ, ma mìc'ajt paady. ²⁸ Je' co yì naax ci'm mìc'ajt

müdüty jaydëb yajyoñ je moc. Jayjip ypidzimy je moc ung, jac'axam ypidzimy yi moc pijy, e chi jada' ytiim'ajtni. ²⁹ Co je moc ymajaaní, chi je jäy ajcxy nicxy moc tzijcp, com ti yhuindiy je moc.

Ijxpejt ma je mostazi pajc

³⁰ Nañ jadu'n Jesús ymíñañ:

—¿Nej m'oc'a'ixíiygixy yi Dios y'ané'min? ¿Ti müd n'ocyajquipyxíhuibich? ³¹ Jadu'n Dios y'ané'min nipaady nej mostaza pajc huídibi tüg jäy nicxy niipy ma ycam. Yi mostaza pajc jacnigi ymúztity ca'ydi jacjadyii ujtzpajc huídibi yajpatp ya naax-huíñ. ³² E co yajniipy je mostaza pajc, chi yoñ, e chi yeegy ooy janch mij, ca'ydi jacjadyii ujtz. E janch mij yeegy tüg'óciy yci' y'aacx, ixti joon ajcxy pe'mb ma je yci'y'aacx y'aniciy.

Nej anajty Jesús yecy je tiy'ajt müd je ijxpejt yciixpi

³³ Jadu'n anajty Jesús yaj'ixpiy je mayjäy ajcxy Dios ytiy'ajt müd canaag jihuimbit ayuc, ixti mibaad ajcxy jëb huinjihuíy. ³⁴ Ac jihuimbit ayuc Jesús yajnimay je mayjäy. Per müd yi'ydiscípulos Jesús ycapxticxtaayb anajty je jihuimbit ayuc.

Jesús capxticx nej huimbizimy je ijxpejt

³⁵ Je huin'it xi co ycoodzíy, chi Jesús nimay yi ydiscípulos ajcxy:

—Tzoc ajt jámim jim'amy ahuin ma yi jadügpí mejypa'.

³⁶ Huin'it Jesús ydiscípulos ajcxy ixmajztay je mayjäy, e müd tzoñ Jesús barcojoty. Nañ jadu'n jacjadyii barco ajcxy choñ quipxy müd Jesús ydiscípulos ajcxy ybarco. ³⁷ Je huin'it coodz tüg poj miñ janch mic. E je mejy nigoo anajty y'ocpidigni.

Janch tigiyb anajty ni barcojoty, jagoo jagoo yca'ujtzatay je barco miid ni. ³⁸ Jesús maab anajty ma je barco iix ma tüg mabejt. Chi yajmäybiidigi, e nimay ajcxy:

—Huindzin, ¿nej ca'mduñcuend co ich ajt yam nguinaanim?

³⁹ Huin'it Jesús ymäybiidigy, e jipcogapxiy je poj. Etz nimay je mejy:

—¡Amon! ¡Huäcxip!

Chi mic'amy je poj ymongidactay yhuäcxijptay jadu'ñyi. ⁴⁰ Huin'it Jesús ymiñañ:

—¿Na'amy co mdzachtzigiiygixy ajcxy? ¿Nej ca' mmibíjccixy co nmíidich Dios ymic'ajt?

⁴¹ Jesús ydiscípulos ajcxy ooy chigiiy, e ñayñimaayi ajcxy miñ xyipy:

—¿Pin jäy jada' jada Jesús? Ooy chachmijhuinmañ co yi poj etz je mejy ycapximidoyii.

5

Je Gadarajäy huídibi anajty ca'oybi miid

¹ Chi Jesús miid ydiscípulos ajcxy oyja'tcixy ma je mejypa' ma je Gadara jäy ñaaxjot. ² Tim mic'amy co Jesús ybarcobidzimy, chi nimiiñ tüg jäy huídibi ca'oybi miid anajty. Hue' anajty chooñ ma öcpi jut. ³ Je yëydijc, ca'oybimiidpi, tzinaayb anajty ma öcpi jut. E ni pin anajty ycamimadägyii. Ni pin camimadacy nicx cixoch tecyxoch jada je ca'oybimiidpi, e ni ca' ajcxy mimadacy miid cadena. ⁴ Canaag'oc ajcxy jacixojch jatecyxojch miid cadena, e ypojtayb anajty je cadena. Ni pin camihuinmañybaady nej jëb ocmimadaaccixy je

ca'oybimiidpi. ⁵ Je ca'oybimiidpi xim tzuum anajty yhuidity tüg yuugjot etz ma öcpi it, janch mic anajty yäxytinäy. E chachnayyajtzaachiyii anajty miid tzaa.

⁶ Jiguëgy anajty je ca'oybimiidpi ymiiñ, co ijxpaty Jesús, chi poyigy ninicxy Jesús, e ycojxtinay'ahuiy ma Jesús yhuinduu. ⁷ Je ca'oybimiidpi mic migapxcooty Jesús, e nimay:

—Jesús, je mijpi Dios y'ung, ¿na'amy co xymidziptzooñich? May'ajt nbijctzooybich ma Dios co ca' ñch jëb huaad xychaachytuñich. ⁸ Je ca'oybi jadu'n yminañ, com Jesús ti anajty nimäy:

—Ca'oybi, pidzimb ma jada yëydijc.

⁹ Jesús y'amidooy je ca'oybi:

—¿Ti mxii?

Chi je ca'oybi y'adzooy:

—Ñich nxii hue' je' “ni may”, com ni may ñch ajcxy huidibi yajpatp ma jada yëydijc.

¹⁰ Huin'it je may ca'oybi may'ajt pijctzoy ma Jesús co ca' ajcxy jëb huaad ixquexyii ma huingbi it lugar. ¹¹ Huingon anajty je cop ma anajty may idzim yjicxcixy. ¹² Chi je ca'oybi ajcxy may'ajt pijctzoy, e nimay ajcxy:

—Najtzquexiyg ma yi may idzim, jigix jëbi n'adigiych njottigiych yi may idzim.

¹³ Chi Jesús jadu'n a'ixiy co jëbi adigiyygixy jotigiyygixy je may idzim. Chi je ca'oybi ypidzimday ma je yëydijc, e yajtigiyday je may idzim ajcxy. Jim anajty yajpaady jahuengi mejtz mil idzim. Chi je idzim ylocjiydaay, e ycögänaxtaay ajcxy ma tüg tzajjip, e oy ycädaaygixy niijoty, e chi ajcxy ññögtay.

14 Je idzim cuend'ajtp ajcxy ooy ajcxy ñay'adzigiiyi, e nicxtay ajcxy poyigy ma ytijc. E oy nimiyaaccixy cajpjoty etz majaty tundac nej anajty ajcxy y'idzim y'öctaaygixy. Mayjäy ajcxy choñ mic'amy oy ijxcixy nej anajty ti ytunyii ti yjadyii. 15 Co je mayjäy ajcxy yja'ty ma Jesús yajpaady, chi ajcxy ijxy je yëydijc huídibi anajty mayca'oybi ymiid. Ijxy ajcxy co ñäy huit miid etz huijyujc, ti anajty y'oyiy. E huin'it ooy ajcxy je mayjäy ñay'adzigiiyi. 16 Je jäy ajcxy huídibi anajty huindicxp co anajty je ca'oybimiidpi ti y'oyiy, etz ijxcixy nej ti ytunyii ti yjadyii miid je may idzim, chi yajmiydactay je maycajpyäy jadu'n nej anajty ti ijxcixy. 17 Huin'it ajcxy pijctzoy may'ajt ma je Jesús, co huen tzooñ ma ajcxy je ñaaxjot.

18 Co Jesús ytigiiy jadüg'oc ma je barco, chi je yëydijc huídibi anajty ca'oybi ti ñibiidzimyii ti ycöb'idzimyii, pijctzoy may'ajt ma Jesús co huen a'ixiy möhuip co huen miid'idyii Jesús. 19 Per Jesús ca' a'ixiy co ymiid'idyii, chi nimay:

—Huimbit ma mdijc etz mjugymigüg, e yajmiidmiydäg jada mijpi tung mijpi huinmañ huídibi je Huindzin Dios ti tuñ miid miich. Miidmiydägipy jadu'n nej je Huindzin Dios ti xypa'ayoy.

20 Chi je yëydijc yhuimbijtni, e huídijtp anajty cajp cajp jim Decápolis ñaaxjot, e nimiydactay tüg'ócay jadu'n nej Jesús ti yajtzögyii, e tüg'ócay je mayjäy ooy jihuüy huinmay.

Je Jairo ñix etz je töxyjäy huídibi Jesús yhuít nïdoni

21 Co Jesús huimbijty barcojoty ma je mejypa' ma anajty ti chooñ, chi mayjäy ymiin ma Jesús

yajpaady, chi Jesús yhuäcxijpy ma je mejypa'.
²² Huin'it Jesús ñija'ti tüg mïjtungmïdipi ma yi judíojäy ajcxy ñaymujctac. Je yëdyjc hue' anajty xïijity Jairo. Co Jairo ijxpaty Jesús, chi ñayhuijojtac ma Jesús yhuinduu. ²³ Jairo may'ajt pijctzoy, yminañ:

—Huindzin, ögaanip ïch nnïx. Tun may'ajt nicxy ma ïch ndijc, e mgïñixájip ma ïch nnïx, jigix jëbi myajtzögip, e yjactzinähuip.

²⁴ E Jesús nicxp anajty mïd Jairo, e mayjäy panicxy anajty Jesús. E je mayjäy ooy anajty tzach'adij'y tzach'agodi'y Jesús. ²⁵ E ma je mayjäy ymiñ anajty tüg töxyjäy pa'm mïd, jécyiñ anajty ymïjtacni. Majmetz jimïjt yxï ybo' anajty cujc payöy, ca' anajty y'oc-huäcxijpni je ni'py. ²⁶ Jada töxyjäy ti anajty yajtzoyduñ mïd may tzoydumbi, ti anajty ymeeñ yajtundäy ma je tzoydumbi ajcxy. E je'ni anajty ypa'm'ity. Ni ti pubéjtin ti capaady, ixti nigï anajty ypa'm mïjhuañ.

²⁷ Jada töxyjäy ti anajty ayuc midoy nej Jesús anajty pa'mjäy yajtzögy, paady nimiñ etz nimïjhuägy jïxcï'py'amy, chi nïdooni Jesús yhuitpa'. ²⁸ Jada töxyjäy nayñimaayi jotjoty huinmañjoty: “Co nnïdónibich Jesús yhuitpa', mïd tim yi'yi ndzögibich.” ²⁹ Co je töxyjäy nïdoñ Jesús yhuitpa', tim huin'ítiy mic'amy yhuäcxijp je ni'py. Huin'it je töxyjäy jïhuïy co anajty ti chögy.

³⁰ E Jesús jïhuïy co anajty ti yajtzögy tüg jäy mïd ymic'ajt, paady ni'ijxhuimbijty je mayjäy huïdibi anajty pamíinip, y'amïdooy ajcxy:

—¿Pin ïch nhuit ti xyñïdoni?

³¹ Huin'it Jesús ñimaayi ajcxy ydiscípulos:

—Miich m'ijxpy co yi mayjäy xychach'adijïy xychach'agodïy, e miich mïna'ñ: “¿Pïn ti xyñidóñich?”

³² Per Jesús huindicxypejty je mayjäy jühuidity ma yi', oc'ixa'ñ ocnejhuïhua'ñ pïn anajty ti ñïdonyii.

³³ Huin'it je töxyjäy, com ñejhuïyb anajty jadu'n nej Jesús ti yajtzögyii, paady nimïjhua'cy Jesús janch tziyuuyb mïid tzigï'ñ ñayhuijojtaci ma yi' yhuindu. ³⁴ Jesús ymïnañ:

—Töxyjäy huïdibi ooy ndzócyich, ti mdzögy mïid co ti xymïbicyich. Nicx agujc jotcujc, ti mba'm ñaxy.

³⁵ Capxp mïydacp anajty Jesús mïid je töxyjäy co nijëjty jäy ñimiini, choñ ma je judío jäy ñaymujctac mïjtungmïidpi ytijc, e nimay je töxy'anäg yteedy:

—Yi mnïix ti je y'ögy. Ca' huaad mjac'amayïy nïg yi Huindzin Jesús.

³⁶ Per Jesús ca' tuñcuend jadu'n nej ajcxy yjamïna'ñ, chi nimay je naymujctac huindzin:

—Ca' mdzigïy, mïbic nïgoda'ajty.

³⁷ E ni ca' jac'a'ixiy nicxy yjacmïdnicxyii jacpïnjaty. Jëda'ajty mïdnicxy je Pedro, Jacobo etz Juan, je Jacobo y'uch. ³⁸ E co Jesús ytijctigïy ma yi naymujctac huindzin ytijc, chi ijxy jadu'n nej jäy jïiby chachne'mgïxy chachjïygyxy chachyaaxcïxy.

³⁹ Co Jesús tijctigïy, chi nimay je jäy ajcxy:

—¿Nej co nïgoo ajcxy mdzachne'mni, e mdzachyáaxcïxni? Yi pi'c töxy'anäg ca' yi' ti y'ögy, maab yi'.

⁴⁰ Per nïgoob ajcxy Jesús nixiicy co jadu'n ymïna'ñ. Huin'it Jesús yajpïdzïmday tüg'ócïy pïnjaty anajty jïiby tigoty, e mïid tijc tigïy jëda'ajty je ungedeedy etz ungdaj, e nañ je tugïgpi ydiscípulos huïdibi anajty ti mïid mïiñ. Chi ajcxy ytigïy jïiby ma

anajty je töxy'anäg yajpaady. ⁴¹ Chi Jesús májtzyi yí töxy'anäg yci', e chi nimay:

—Talita, cumni —jadayaab ayuc hue' yí' yhuimbǐdzımy: Töxy'anäg, ìch miich yam nımaayb, pǐdǐg.

⁴² Huin'ítıy je töxy'anäg, je huıdibı anajty ma-jmetz yjimıjt, ypǐdǐgy e ytüyöychoñ. E tüg'óciy yí mayjäy ooy ajcxy jıhuıy huınmay. ⁴³ Huin'it Jesús najtzcapxııy co ca' huaad pın yajnimay jadu'n nej je töxy'anäg tı chögy, nañ jadu'n ni'ane'mdıy co huen ajcxy yajcay je pı'c töxy'anäg.

6

Jesús yajpaady jım Nazaret

¹ Huin'it Jesús chooñ ma je jımbı it lugar, e yhuimbıjty ma yci'mgajp. E mıd ñıcxı yí ydiscıpusos ajcxy. ² Sábado xııjoty Jesús ytıgyı yaj'ıxpıjcp ma je mayjäy huıdibı yöymújccıxp ma je judío jäy ñaymujctac. E je mayjäy huıdibı amıdoo'ıjtp anajty ooy jıhuıy huınmay ajcxy, e ñayñımaayı ajcxy mıñ xyıpy:

—¿Ma jada' jadayaab jäy tı ni'ıxpıgıy jadayaab ıxpıjcin? ¿Ma tı paady jada huıy'ajt cujc'ajt huıdibı ymııd? ¿Ma jada' tı paady yı mıc'ajt huıdibı mıd mıjhuıma'ñ tımyb? ³ Je' jada je tzejtzpı, yı María y'ung. Yı' y'uch ymıgüg, yı Jacobo, yı José, yı Judas, etz yı Simón. Nañ jadu'n yı' y'uch töxyjäybı cha ajcxy chinäy quıpxy mıd ìch ajt.

E je mayjäy ca'ajcxy anajty ıxa'ñ cöbıga'ñ Jesús. ⁴ Huin'it Jesús nimay je mayjäy ajcxy:

—Huenma'ámyıty tüg'óciy je mayjäy ooy yajmıj'aty je jäy ajcxy huıdibı najtzcapxııyb Dios

y'ayuc. Jëyi janchtiy, ma yci'm naax ma yci'mgajp ca' je jäy ajcxy yajmij'adyii, etz nañ yti'm jadu'n yi' y'amigügtijc etz ymijjin ymidijc.

⁵ Ma yci'm naax yci'm gajp Jesús ca' jaty nej mijhuinmañ tunipy miid co ca' ajcxy mijpidägyii. Jëyi yci'pidacy ma nijëjity pa'mjäy etz yajtzoocy.

⁶ Jesús ooy jihuüy huinmay nej je jäy ajcxy ca' ymijpidägyii ma yci'm naax yci'm gajp. Chi Jesús chooñ jim ñicxy ma jacjadyii cajp huinduy agonbi, e yaj'ixpijcy anajty je mayjäy ajcxy.

Jesús quexy ydiscípulos ayuccapxhuäcxp

⁷ Huin'it Jesús mijhuoy je majmetz ydiscípulos ajcxy, e chi quejxhuäcxy nimetz nimetz ma canaag cajp. E chi mooy mic'ajt, jigix jëb yajpidzimy ajcxy ca'oybi ma jäy ajcxy. ⁸ Nañ jadu'n y'ane'my Jesús je' ydiscípulos ajcxy co ca' huaad ti miníxcixy tü'amgixpi, jëyi jëb miníxcixy tüg tajc nidüg nidügti. Ca' huaad miníxcixy ymorral, e ca' huaad miníxcixy ycaagy, e ca' huaad miníxcixy ymeen. ⁹ Jëyi je yci'g etz je yhuit huidibi anajty ajcxy ymiid huen miníxcixy. ¹⁰ Chi Jesús yminañ:

—Co anajty ajcxy mjättaccixy ma tüg tijc, jim ajcxy mhuimipy ixti coon mdzoonip ma yijimbi cajp. ¹¹ Pen mdigiygixp ma tüg cajp, e je jäy ajcxy ca' ajcxy xycöbigañ, ca' ajcxy amido'idañ miich m'ayuc, mbidzimgix ma je cajp, chi mhuinhuópcixipy mgig. Jada je' je tiy'ajt co ca' ajcxy mjotcújcity. Janch ñch miich ajcxy nimäy co Dios anajty ytiyduñ jada naaxhuiñ jäy, jacnigi tzaachypa paadañ yi' jäy ajcxy huidibi ajcxy anajty

ca' xycöbǰccixy, ca'ydi je' ajcxy huídibi tzinaay jecy'aty ma Sodoma etz Gomorra cajp.

12 Chi je nimajmetzpi ajcxy chon Dios y'ayuccapxhuäcxy co huen jäy ajcxy jothuimbǰtcixy, huen ixmajtztaaygixy yi pocytunü. 13 Nañ jadu'n ajcxy yajpidzimy ca'oybi majaty jäy, e pidaaccixy aceite majaty pa'mjäy, e yajtzóccixy anajty.

Co Juan je Bautista y'ögy

14 Huin'it je rey Herodes nejhuüy co Jesús canaag mijhuinma'ñ tzachytuñ anajty, com tüg'ócüy je mayjäy anajty nimydaaccixy Jesús. Herodes ymínañ co Juan je Bautista ti yjugypicy jadüg'oc ma anajty ti y'ögy, paady mic'ajt müdity jaydeb mijhuinma'ñ tuñ. 15 Nijëjty jäy ymínaangixy:

—Jesús yi' je' Elías.

E naagity jäy ymínangixy:

—Yi' je' tüg Dios tiy'ajtmüdpi huídibi quipxyüby müd je Dios ytiy'ajtmüdpi huídibi tzinay jecy'ajty.

16 Co Herodes nejhuüy nej je mayjäy nimydaaccixy Jesús, chi ymínañ:

—Janch jada co Juan ti yjugypicy, je huídibi nni'ane'mdüyich co huen yajmínagyii ycohuajc.

17 Müd Herodías, Herodes ytöxytjic ycixpi, Herodes n'ane'mdüy co Juan yajmach, e pidägyii pujxtigoty. Jada Herodías jayijp ypijcy müd je rey Herodes y'ajch Felipe, per ti anajty ixmach Felipe, e ypijctigajch müd je ycapy Herodes. 18 Hue' anajty Juan ti nimay Herodes:

—Ca' jadu'n paadyii co yi m'ajch Felipe ytöxytjic müch müddzinaayi.

19 Paady ycixpi Herodías mijotma'ty Juan, e ytimy yaj'ögamy anajty. Per ca' mic'amy yhuinma'ñybaty nej ocyaj'ögip; 20 com je rey Herodes ñejhuñy b co tudägy jäy huädz jäy anajty je Juan, e tzigñy b anajty müid Juan. Paady ycixpi anajty je rey Herodes Juan müidity cuend'aty pujxtigoty. Naag'oc naag'oc anajty Herodes nicxy amido'ity Juan y'ayuc, ooy anajty huinmay nej yhuimbidzimy, per jotcuje anajty amido'ijty.

21 Huin'it Herodías ypat huinma'ñ nej jëb yaj'ögy Juan je huin'it xii co je rey Herodes anajty ñayñixidunñy. Hue' yajcay yaj'uucy je gobierno ytumbi ajcxy, je soldado huindzin ajcxy, etz tüg'ócay yi mic jäydijc huidibi ajcxy tzinaayb naag naag cajp jim Galilea. 22 Xidunñyoty anajty co Herodías ñix oy y'ech ma je rey anajty yajpaady müid je may jäy huidibi anajty yajcaayb yaj'uucy. E jadu'n nej je Herodías ñix y'eich, ooy je rey jadu'n jäygidacy, etz tüg'ócay je jäy je huidijaty anajty müid ajcxy ycaaygixy y'uuccixy. Chi je rey nimay je töxy'anäg:

—Pijctzóohuigich ti mdimdzojcpy, ñch miich nmöhuipy.

23 Je rey ñigi capxcödujcy janch cixyjot huinijot co möhua'ñ ti ytimy ypijctzooyb, ixti jëb jamöy cujuäcxy yi' y'ané'min, mibaad anajty ane'my je naaxjot. 24 Chi je töxy'anäg ñicxy ma ytaj oy amidoy, nimay:

—¿Ti nbijctzohuípich?

Chi je' ytaj y'adzooy:

—Pijctzoohu i yi Juan je Bautista ycohuajc.

25 Míc'amy je Herodías ñiix nihuimbity je rey e yminañ:

—Ndzojcyꝑich co xymöhuibich míc'amy je Juan je Bautista ycohuajc ma tüg texy.

26 Co jadu'n midoy je rey, chi ytiꝑiy tajp mayb janch mijcajee. Per ti y'octunipy. Com ti anajty jadu'n capxcöducy, ti anajty mayjäy midoy ti anajty ti yaj'ahuaniy je töxy'anäg, ca' y'ayuc yajxiicy.

27 Paady ycixꝑi je rey míc'amy ane'my tüg soldado, co huen nicxy yajtzoni Juan ycohuajc. 28 Chi je soldado ñicxy ma pujxtijc, e yöcpujxtuuty Juan. Chi je soldado mimiñ Juan ycohuajc ma tüg texy, e yajcidiꝑiy je töxy'anäg, e je töxy'anäg yajcidiꝑiy ytaj.

29 Co je jäy ajcxy huídibi anajty mijnicxpejtp Juan ñejhuiy ajcxy co je rey ti yaj'ögy Juan, chi ajcxy y'oy e yajꝑidici Juan ñinicx, e yajnaaxtigiy ajcxy.

Jesús yajcaay migoox mil yëydijc

30 Co je majmetzꝑi apóstoles ajcxy yhuimbijty huídibi anajty Jesús ti quexy y'ayuccapxhuäcxꝑi ma canaag cajp, chi ajcxy yajmidmíydacy Jesús tüg'óciy tijaty anajty ti túngixy, etz tüg'óciy ayuc huídijaty ti yaj'ixꝑijccixy. 31 Huin'it Jesús nimay je nimajmetzꝑi huídibi anajty ti quexy y'ayuccapxhuäcxꝑi:

—Tzoc jámim ma tüg it ma ca' ꝑin, jaydëb nbócxim tüg xií metz xií.

Paady ycixꝑi Jesús jadu'n yminañ, com tzach mayjäy ja'ttiib tzondiib ma Jesús yajpaady, e ca' ajcxy tiempo anajty mídity mina ycaaygixipy y'úuccixipy míd je mayjäy ycixꝑi. 32 E Jesús míd ydiscípulos ajcxy ñicxy barcojoty ma ca' ꝑin. Ac

jëyi ajcxy nicxy ca' jac pin jäy mïid nicxy. ³³ E mayjäy ijxy co Jesús ajcxy choñ, e nañ ijxajpy pin anajty tzoñ barcojoty. Paady mayjäy chooñ ma canaag cajp tegyi'm, ñíxcixy poyïgy anajty ma Jesús ñíxa'ñ. Mayjäy oy yja'ty jayïjp ca'ydi Jesús ajcxy, e jim ajcxy yöymujctay. ³⁴ Co Jesús ybarcopïdzïmy, chi ixy janch mayjäy, e Jesús ooy pa'ayoy je mayjäy, com jadu'n anajty ajcxy nej maycöbixy huïdibi ca' mïidity ycuend'ajtpi. Chi Jesús ytigiy yaj'ixpijcp, canaag nax ixpïjcin anajty yecy. ³⁵⁻³⁶ Co anajty ti chu'ïyñi, chi Jesús ydiscipulos ajcxy ñïmaayi:

—Ca' ni pin chinäy ma jadayaabi it lugar, e ti chu'ïyñi. Capxycix mïid jada mayjäy ajcxy, jaydeb ñíxcixyñi ma yi cajp huïnduy agonbi, huen nicxy júygixipy ycaayin y'uucin.

³⁷ Huin'it Jesús y'adzooy yi' ydiscipulos ajcxy:

—Miich ajcxy móoygix jada mayjäy caayin úucin.

Chi ajcxy Jesús y'adzooy:

—¿Huaad ñich ajcxy nicxy njuy mejtz mïgo'px denario tzajcaagy, jigix ycaayipy y'ügipy jada mayjäy?

³⁸ Chi Jesús y'amïdooy ydiscipulos ajcxy:

—¿Naag tzajcaagy miich ajcxy mïidity ya? Nicx íjxcix.

Co ajcxy tiy'ajt paty, chi ajcxy Jesús ñimay:

—Íich ajcxy nmïid mïgoox tzajcaagy etz metz acx.

³⁹ Chi Jesús ni'ane'mdïy co je mayjäy huen ix-taaccixy naaxcixy tügpicyjaty. ⁴⁰ Chi je mayjäy y'ixtactay canaagpicy. Canaagpicy mïgo'px jatypi, e canaagpicy huixchiguïpxmajcjatypi.

41 Chi Jesús conġy je miġooxpġi tzajcaagy etz je metzpi acx, e ypa't'ijxy tzajpcíxy, e yajnaxxy Dios cojuyip ma Dios miid je tzajcaagy etz je acx ycixpi. Huin'it Jesús tujc-huäcxy je miġooxpġi tzajcaagy, e yajcġidġiy je' ydiscípulos ajcxy, jaydġeb ajcxy ya-jhuäcxip ma je mayjāy. Nañ jadu'n Jesús yajcġidġiyy je metzpi acx je' ydiscípulos ajcxy, jaydġeb ya-jhuäcxip ma je mayjāy. 42 Nidüg'óciy je mayjāy ajcxy ycay y'uucy cūxyi. 43 Co je mayjāy ycayday, chi je discípulos ajcxy yajmujcy je cayduc tzütztuc, e yaj'ujch ajcxy majmetz cach. 44 Miġoox mil anajty ajcxy je yġydiġtġjc huġdibi cay uuc.

Jesús yöy nāhuingíxy

45 Huin'it Jesús ane'my je' ydiscípulos ajcxy co huen barcotiġiygixy mič'amy. Huen ničxġcixy jayijp jim Betsaida jim mejy ñġnajxy. Co yi discípulos ajcxy ybarcotiġiyday, chi Jesús ycapxycġjxy miid je mayjāy. 46 Co anajty Jesús ti ycapxycġxy miid je mayjāy, chi ñġcxy ma tüg cögop Dios mičġtzoob. 47 Co ycoodzġiyyñi je discípulos ajcxy anajty yajpaady mejyoty ma je barco. Jesús naydüg anajty yajpaady mejypa'. 48 Jesús y'ijx co je'ydiscípulos ajcxy anajty ti y'anucxġiygixy miid mejycabi, je' co je barco anajty chachġjpcobojġy. E co oy moñġy, chi Jesús ymiġhuägy ma je barco. Jesús yöyp anajty mejyhuingíxy, e hue' anajty jüyöyñaxamy je discípulos ajcxy. 49 Co ajcxy ijxpaty Jesús yöyp anajty mejyhuingíxy, chi ajcxy ooy yaxqueegy, com hue' anajty ajcxy tijy co niġo y'ijxmañġiygixy. 50 Com tüg'óciy yi discípulos ajcxy anajty ti ijxcixy

Jesús, e ooy ajcxy chigiiy, paady mic'amy Jesús migapxy je' ydiscípulos ajcxy, e nimay:

—Jotmic naybidáacigixy, ca' mdzigiiygixy. Ich yi'.

⁵¹ Huin'it Jesús ybarcotigiiy, e mic'amy je poj yxeemy, e je discípulos ajcxy ooy jihuüy huinmay.

⁵² Ooy ajcxy jihuiygixy huinmaaygixy, com ca' ajcxy huinjihuüygixy anajty nej Jesús je mayjäy yajcay müid je migooxpí tzajcaagy. Com je'ni anajty ajcxy ooy yjotjuuñity ycöjuuñity.

Jesús yajtzögy pa'mjäy ajcxy jim Genesaret

⁵³ Chi ajcxy ymejch ma je mejypa' ma je Genesaret ñaaxjot. E coxojch ajcxy je barco ma mejypa'.

⁵⁴ Co ajcxy ybarcopidzimy, chi mic'amy je mayjäy ajcxy jim ijxcajpy Jesús. ⁵⁵ Poyigy je jäy ajcxy chooñ, e yajyöyñajxtay je cajp ajcxy huinduy agonbi, capxhuäcxixy co Jesús anajty ti yjädy jim. E jäy ajcxy yajmiindzondacy may pa'mjäy cijx'am jim ma anajty Jesús yajpaady. ⁵⁶ E hueñytim ma'amyity anajty Jesús ñicxy majaty mij cajp, mutz cajp, o majaty jäy y'ujtztzinäy, ooy anajty ajcxy pidáccixy pa'mjäy majaty majaty yi mij tüba', e cohuaniiygixy Jesús co huen nidoñyii yi yhuitpa', e tüg'óciy huídijaty anajty ajcxy nüdomb, najxp ajcxy anajty je' ypa'm.

7

Huüdi jäy yaj'ahuimbijt pocyjayity

¹ Huin'it ymiiñ ma Jesús nijëjity fariseojäy ajcxy, je huindzindijc huídibi tzachpadumb judío ycos-tumbre. Nañ jadu'n müid müiñ nijëjity escribas, je huindzindijc huídibi ajcxy nijaydutp anajty Dios

ñecy. Hue' je fariseos etz escribas ajcxy anajty ti choongixy Jerusalén. ² Je fariseos etz escribas ajcxy ijxy co Jesús ydiscípulos ajcxy ytigiiy caaybi uucpi jaygĩbuju, ca' anajty cuydúngxixy judíoájy ycostumbre. ³ (Com yi fariseojáy etz jacjadyii judíoájy ajcxy cuydumby anajty ajcxy ñi'ap costumbre, e ixpocypújcixy jayijp ma ca'ni ytigiiygixy caaybi uucpi. Com yi judíoájy ajcxy co ajcxy ñicxy mayjáyjoty etz yhuimbíjtcixy jadüg'oc ma ytijc, ca' ajcxy ycaixti cooni jayijp ajcxy ycibújcixy canaag'oc. ⁴ Yi judíoájy ymiid canaagnax costumbre huídibi cuydúngxixyp jadu'n nej ajcxy yajhuaatzcixy ajcxy ytaasi ytexy ytütz etz ypujxtexy.) ⁵ Chi je fariseos etz escribas ajcxy y'amídooy Jesús, nimaayi:

—¿Na'amy co miich mdiscípulos ajcxy ca' cuydúngxixy judíoájy ñi'ap costumbre? ¿Na'amy co ajcxy ycaaygixy y'úccixy, e ca' jayijp ixpújcixy yi' ypocyi?

⁶ Chi Jesús y'adzooy:

—Janch tiy'ajt jadu'n nej je Dios ytiy'ajtmíidpi Isaías jayhuim'y jecy'ajty miid miich ajcxy ycixpi. Miich ajcxy huídibi naybidaacip jadu'n nej jihuüy ajcxy tudägyjäy, e ca' yjáncíty. Com jadu'n Isaías jaybejty co Dios jadu'n ymínañ:

Jada jäy jadu'n ajcxy ycapxcixy ymiydaaccixy jadu'n nej jihuüy xyajmij'atyich. Per ca' ajcxy xyajmij'atyich cixyjot huinijot.

⁷ Naadigĩ co ajcxy xyhuin'ígixich xyhuinyáaxcixich. Ñayyaj'ixpíjcigixy ayuc tiy'ajt huídibi jäy ajcxy ti cojy ti macxy.

⁸ Chi Jesús ymínañ:

—Miich ajcxy ti m'ixmájtzcixy Dios ycötújcín, e myajmij'ájtzcixy ayuc huinma'ñ huídibi jáy ci'm ti cojy ti macxy. ⁹ Miich ajcxy ca' mgüendtúngixy Dios ycötújcín Dios ytiy'ajt jigix jëbi cuydúngixy mgi'm costumbre. ¹⁰ Com Moisés je cötújcín ypidac jecy'ajty: “Yajmij'at mdaj mdeedy”, e “Pinjaty jibic nigapx ni'ojiiyb ytaj yteedy, copícy y'ögip.” ¹¹ E miich ajcxy mīnañ co tūg jāy nīmāhuip ytaj yteedy co ca' pubeda'ñ ajcxy jadu'n nej padyii, mīd co tūg'ócīy tijaty yi' ymīd huídibi ytaj yteedy jē'adánip, hue' ti ahuanīy nigoo ma Dios. ¹² E pen jadu'n mīnañ, chi miich ajcxy mīnaangixy co ca' copícyity mbubéjtcixipy mdaj mdeedy. ¹³ Miich ajcxy midundigooyb Dios ycötújcín mīd mgostumbre huídibi myajnajxyp myajtigīyb, etz jacjadyii jibic-huinma'ñ myaj'ixpíjccixy.

¹⁴ Jadūg'oc Jesús mījhuoy yi mayjāy ajcxy, e chi nīmay:

—Mido'mbījccix miich ajcxy iich n'ayuc, e mhujnjihuīhuip ajcxy. ¹⁵ Ca' yi' yajpocycāhuīyb huídibi jāy ajcxy ypidacy ma yhuin y'ahuac. Yi' janchtiy huídibi pidzim ma jāy ajcxy yjot yhuinma'ñ, yi' yi' yajpocycāhuīb. ¹⁶ Miich ajcxy mmīd mdātzac, mido'mbījccix iich n'ayuc.

¹⁷ Co Jesús ixmajch je mayjāy, e ytijctigīy, chi je discípulos ajcxy yaj'amidoohuī nej yhuimbīdzīmy jada ayuc. ¹⁸ Chi Jesús ydiscípulos ajcxy nīmay:

—¿Nej nañ jadu'n miich ajcxy ca' mhujnjihuīy jada ayuc? ¿Nej ca' mhujnjihuīygyxxy co huídibi tigīy ma yi jāy y'ahuac (yi caayīn uucīn), ca' yi' yajpocycāy yi jāy? ¹⁹ Yi' caayīn uucīn hue'

yí jäy ypidägy ma y'aa ymoox ca' nan ma yjot yhuinma'ñ, e co ñax ma y'aa ymox, chi ypidzimni.

Co Jesús jadu'n ymına'ñ, chi nejhuııyım co Dios ca' capx'aducy ni ti caayın ni ti uucin. ²⁰ E Jesús yjacmınañ:

—Dios yajpocycähuiꝑ jäy ajcxy mıid huıdibi pidzim ma ajcxy yhuinma'ñ. ²¹⁻²² Ma yí jäy ajcxy yhuinma'ñ jııby chooñ jııbic-huinma'ñ; jııby chooñ mıgapxtıgoyıı töxyjäy yhuinma'ñ; jııby chooñ je tundıgooyıı yëydıjc mıid töxyjäy etz töxyjäy mıid yëydıjc huinma'ñ; jııby chooñ jäyyaj'ögıı huinma'ñ; jııby chooñ meedzıı huinma'ñ; jııby chooñ mügıı huıdidıı huinma'ñ; jııby chooñ jııbic-huinma'ñ; jııby chooñ je huin'ınıı huinma'ñ; jııby choñ nayca'oy'ixıı huinma'ñ; jııby chooñ je piıtzcapxıı huinma'ñ; jııby chooñ je amıj agıx huinma'ñ; jııby chooñ je tzuu huinma'ñ je locı huinma'ñ. ²³ Yı jadu'mbi jııbicꝑı jııby chooñ ma jäy ajcxy yjot yhuinma'ñ, paady jııbicꝑı jäy ajcxy tıngıxy, e ypocycäy ajcxy ma Dios.

Tüg töxyjäy huıdi ca' yjudıojäyıtı mııbjc Jesús

²⁴ Chooñ Jesús ma yıjıımbı it, e ñıcxıy jım ma Tıro etz Sidón ñaaxjot. Jesús ytıgıy ma tüg jäy ytıjc, e ca' anajty tzocy co je mayjäy ñejhuııhuııyb ma y'ıty. Per ca' jajty nıcx yhuıngoyüch. ²⁵ Mıc'amy tüg töxyjäy nejhuııy ma Jesús anajty yajpaady. Hue' je töxyjäy yꝑı'cnııx ymııd anajty ca'oybı. Je töxyjäy ymııñ ma Jesús, e ycojxtınay'ahııy ma yı' yhuınduu. ²⁶ Je töxyjäy hue' anajty ycogájꝑıty Sırofencia (e hue' anajty gııegojäy). Yı töxyjäy may'ajt ꝑıjctzoy ma Jesús co huen yajpidzimy je ca'oybı ma yꝑı'cnııx yjot yhuinma'ñ. ²⁷ Chi Jesús je töxyjäy nıımay:

—Ooy ycopícyity co nbubedipyich jayijp Dios yjáy (yí judíoájáy). Jadu'n nipaady nej tüg ungedeedy. Tim copícy co je ungedeedy yajcayipy jayijp yci'm ung, e ca' möhuip uc je huídibi y'ung yajjicxaamy.

²⁸ Chi je töxyjäy y'adzooy:

—Huindzin, tiy'ajt nej miich mmínañ, per nañ jadu'n yí uc ajcxy yjicxyp je caagy abu'x huídi cáb naaxcíxy ma mesípa't ma je jäy y'ung ajcxy ycaay.

²⁹ Chi Jesús je töxyjäy nímáy:

—Tiy'ajt jadu'n nej ích miich tí xy'adzooy, paady ycxipi jéb mhumbidipy ma mdíjc jotcujc, je ca'oybí tí ypidzimy ma mníx yjot yhuinma'ñ.

³⁰ Co je töxyjäy huimbijty ma ytíjc, chi paty ypi'cníx cíx'am, tí anajty je ca'oybí ñíbidzimyíi ycöbidzimyíi.

Jesús yajtzögy tüg jäy huídibi cönat etz ahui'mb

³¹ Chi Jesús jím tzojci chooní Tiro ñaaxjot. Chi chooñ jím ñíxcy anajty Galilea, e níxcy ma je tü'aa huídibi najxp Sidón etz je cajp huídibi yajpatp jím Decápolis ñaaxjot, chi yja'ty ma Galilea mij laguunba'. ³² Jím ajcxy míd miiñ tüg jäy huídibi cönátíp etz aahuí'mb. Chi ajcxy may'ajt pijtzooy ma Jesús huen cíníxajy je pa'mjäy. ³³ Chi Jesús mídnicxy je pa'mjäy ahuingujc ma ca' mayjäy, e pídacý ycíhua'x ma je pa'mjäy ytätzac. Chi chujy, e huin'it nídóni je ytoodz. ³⁴ Chi Jesús ypa't'íjxy tzajpcíx, e ymicxejy, e chi ymínañ Aramaico'amy:

—Efata —jada ayuc hue' yhuimbídzimy: Ahuädz.

³⁵ E mic'amy je jäy cönatpi ytätzac y'ahuaach etz ytoodz yungíy etz ycapxni yajxon. ³⁶ Chi Jesús

ane'my je pa'mjäy etz ymīgügtijc co ca' huaad ni p̄in yajm̄idm̄iydägipy jadu'n nej anajty ti chögy. Co Jesús jadu'n mictägy ane'my co ca' huaad ni p̄in yajm̄idm̄iydägipy je mijhuinma'ñ huidibi ytumyb, chi n̄igi je pa'mjäy etz ymīgügtijc m̄idm̄iydaaccixy hueñyp̄inity. ³⁷ Je mayjäy ooy tzachjihuiy huinmay ajcxy, ñayñimaayı ajcxy miñ xyipy:

—Jada Jesús ooy oy chachtuñ. Ym̄imadactaayb yi'huenytimytııity, ixtı yajmidohuı̄cpy yi' yi cönatpi etz yajcapxıgy yi uumbı.

8

Jesús yajcay midax mil yëydıj

¹ Je huin'it xıı je huin'it tiempo mayjäy anajty ti ñaym̄ıjcgıxy ma Jesús yajpaady, e ca' anajty je mayjäy ajcxy m̄ıdıty ti ycáaygıxy y'úuccıxy. Jesús capxyñıguejxy je' ydiscıpus ajcxy, co huen miingıxy ma yi' yajpaady. Co ajcxy ymııñ, chi nımay:

² —Ooy nba'ayooyıch yi mayjäy. Yi' co cham midugıg xıı maabi ya m̄ıd y'ıtyıch je mayjäy, e ni ca' ajcxy m̄ıdıty ti ycayıpy. ³ Co ixıpy nguex-huimbıtyıch ajcxy ma ytıj ayuu, ca' yjécyıty yajpa'ımgójıpy ajcxy tü'am, com nijějıty ajcxy jıguëgy ti choongıxy.

⁴ Chi je discıpus ajcxy Jesús adzooy:

—¿Ma ııch ajt nbaatım je caayın uucın huidibi jëb m̄ıd nyajcaayım nyaj'úucım jada mayjäy? Com mıjtıgıduum ya nyajpaatım ma ca' p̄in chinäy.

⁵ Chi Jesús y'amıdooy je' ydiscıpus ajcxy:

—¿Naag tzajcaagy mııch ajcxy m̄ıdıty?

Chi je' ajcxy y'adzooy:

—Huixtujc tzajcaagy.

⁶ Chi Jesús ane'my je mayjäy, co huen iñay'ahuñygyxy naaxcíxy. Huin'it Jesús congy je huixtujcp tzajcaagy, e yajnaxy Dioscojuyip ma Dios miid tzajcaagy ycixpi. Chi tujc-huäcxy je tzajcaagy, e moy je' ydiscípulos ajcxy, e je' ydiscípulos ajcxy yajhuäcxy je tzajcaagy ma je mayjäy. ⁷ Je Jesús ydiscípulos ajcxy ymiid anajty nijéjity pi'c acx. Chi Jesús yajnaxy Dioscojuyip ma Dios miid je pi'c acx ycixpi, e moy je' ydiscípulos ajcxy huen yajhuäcxtaygyxy ma je mayjäy. ⁸ Chi je mayjäy nidüg'óciy ycaay cüxyi, e co ajcxy ycaayday, chi je Jesús ydiscípulos ajcxy yajpidigy huixtujc cach cayduc jicxtuc tibi anajty yconaxy. ⁹ Jahueeni anajty ycamidaaxmility je jäy huidibi ajcxy cay uuc cüxyi. Chi Jesús ycapxy ycijxy miid je mayjäy, e nimay ajcxy co huen nicxcixy ma ytijc. ¹⁰ E mic'amy Jesús ybarcotigy miid ydiscípulos ajcxy, e chi ñicxy ajcxy jim Dalmanuta ñaaxjot.

Yi fariseos ajcxy tüg ijxpejt pijctzoob mijhuinma'ñybi

¹¹ Nijéjity fariseos ajcxy, je huindzindijc huidibi padumb judío ycostumbre, ymiñ ajcxy ma Jesús yajpaady, e ytigy ajcxy ijxquípxcixy y'ixpijcin miid Jesús. Pijctzoogixy co Jesús huen yaj'ixyii ajcxy tüg ijxpejt huidibi tzomb tzajpjoty. Ijxta'n oc-tunaangixy miid Jesús. ¹² Chi Jesús tajy may ñayjihuiyijotjoty huinma'ñyoty, chi ymicxejy, e ymiñ:

—¿Na'amy co jada jäy ajcxy huidibi jugy'ajtp cham, pijctzoogixy ijxpejt huidibi tzomb tza-

ppjoty? Janch ñich miich nimaaygixy co ca' nyaj'ixaangixy ijxpejt huídibi tzomb tzajpjoty.

¹³ E Jesús ytimycapxycixy mïid je fariseos ajcxy, e chi puyöyduuty ajcxy. Chi Jesús ybarcotigiy, e ñicxy mïid ydiscípulos ajcxy ma mij laguun ñinaxy.

Fariseojäy ajcxy yaj'ixp'ijcin

¹⁴ Je' ydiscípulos ajcxy ti anajty jaydigoygixy je jicxy picy co ajcxy ybarcotigiy. Jëyi ajcxy mimiiñ tüg pi'c tzajcaagy. ¹⁵ Chi Jesús ane'myb je' ydiscípulos ajcxy, e ymïnañ:

—Ca' mmijpidaaccixy yi fariseojäy ajcxy y'ayuc ytiy'ajt etz ni rey Herodes y'ayuc ytiy'ajt, com jadu'n ajcxy y'ayuc nipaady nej levadura huídibi ca' y'óyity.

¹⁶ E je Jesús ydiscípulos ajcxy nimiydaaccixy Jesús y'ayuc ñayñimáayigixy ajcxy miñ xyipy:

—Je' co ca' ñich ajt nmimiinim caayin uucin.

¹⁷ E Jesús ñejhuuyb anajty nej je' ydiscípulos ajcxy ñayñimaayi miñ xyipy, paady ymïnañ:

—¿Na'amy co mdzachnimiydaaccixy je caayin uucin huídibi ti mjäydigooygixy? ¿Nej ca' mhujnjihuyigixy e ca' mguenditungixy ñich n'ayuc? ¿Nej co ajcxy mdzachcöjuuñity? ¹⁸ Miich ajcxy mïid mhuiin: ¿Nej co ca' m'ijxcixy huídibi ndumybich? Miich ajcxy mïid mdädzac: ¿Nej co ca' mmido'mbïjccixy ñich n'ayuc? ¿Nej co ca' mjäyméjtzicxy ti ti nduñich? ¹⁹ Jayhuin co ndujc-huäcxyich je migooxpï tzajcaagy e nyajcaayich migoox mil jäy: ¿Naag cach cayduc jicxtuc ti ajcxy myajpidigy?

Chi ajcxy y'adzooy:

—Hue' ñich ajcxy nyajpidĩgyich majmetz cach cayduc jicxtuc.

²⁰ Chi Jesús ymĩnañ:

—E jayhuin co ndujc-huäcxyich je huixtujcpi tza-jcaagy, e nyajcaayich mĩdaax mil jāy: ¿Naag cach cayduc ti ajcxy myajpidĩgy?

Chi ajcxy y'adzooy:

—Hue' ñich ajcxy nyajpidĩgyich huixtujc cach cayduc jicxtuc.

²¹ Chi Jesús ymĩnañ:

—¿Nej chambaad miich ajcxy ca' mhuiñjihuñy?

Jesús yajtzögy tũg jāy huintzpi jim Betsaida

²² Jesús etz ydiscípulos ajcxy oy yjá'tcixy jim Betsaida. Jim Betsaida nijējity jāy mĩd mĩñ ma Jesús tũg huintzpi, e pijetzoy ajcxy may'ajt co huen nĩdoñ jigix je huintzpi y'ijxĩgipy. ²³ Huiñ'it Jesús huijtz-zooñ je huintzpi ma yci', chi mĩd cajppĩdzĩmy. E chi Jesús yajjaaxy yĩ chuijyñi je huintzpi yhuin, etz cĩñxajy, e chi amĩdoy pen y'ijxpy anajty tigati yinjaty huenjaty. ²⁴ Chi je huintzpi huindĩcxpejty Jesús, e nimay:

—N'ijxypich yēyĩjctijc, e jadu'n ajcxy yquēxĩgy nej quipy, per yōyp ajcxy.

²⁵ E jadũg'oc Jesús yci' pĩdacy ma je huintzpi yhuin, e chi je huintzpi yhuindĩcxpejtpy anajty, e chi yhuin y'oyñy yajxon, huiñ'it oy huädz y'ijxy.

²⁶ E Jesús ycapxycĩjxy mĩd je', e quejxhuimbijty ma ytijc. Chi ymĩnañ:

—Ca' mdĩgĩhuip cajpjoty, e ni pĩn jada mgayajmĩdmĩydĩgipy.

Pedro capxypĩdzĩmy co Jesús yĩ'je'je Cristo

27 Chi Jesús ñicxy m̄id ydiscípulos ajcxy j̄im ma nijj̄ity mutz cajp m̄ihuingon je m̄ij cajp Cesarea Filipino. E tü'am Jesús am̄idooy ajcxy ydiscípulos, ñimay:

—¿Nej jāy ym̄inaangixy p̄in ñich?

28 Chi ajcxy je' ydiscípulos y'adzooy:

—Nijj̄ity jāy ym̄inaangixy co miich je' je Juan, je Bautista. E nijj̄ity ym̄inaangixy co miich je' je Elías. E jacjadyii ym̄inaangixy co miich je' t̄üg Dios y'ayucnajtzcapx̄iyb̄i hūidib̄i t̄üḡiyb̄ m̄id nijj̄ity Dios yt̄iy'ajtm̄idp̄i hūidib̄i tz̄inaay jecy'ajty.

29 Jesús y'am̄idooy je' ydiscípulos ajcxy:

—Miich ajcxy, ¿nej miich mm̄inaangixy p̄in ñich?

Chi Pedro y'adzooy:

—Miich je' je Cristo.

30 Chi Jesús ñimay je' ydiscípulos ajcxy co ca' huaad ni p̄in ñimaaygixy, co ȳi' je' je Cristo.

Jesús capxyp̄idz̄im̄y co y'öga'ñ

31 Chi Jesús jacyaj'ixp̄icy je' ydiscípulos ajcxy, e ym̄inañ:

—Cop̄icy co ñich, je jāy hūidi tzoön tzajpjoty, nya-jnaxipyich m̄ij tzaachpyi etz m̄ij ayo'n. Ȳi m̄ijj̄aydj̄ic ajcxy, ȳi judío teedy m̄ijtungm̄idp̄i, etz ȳi escribas, je hūindz̄indijc hūidib̄i ñijayduut̄cixyp Dios necy, ca' ajcxy xy'ixa'ñich, e xyaj'öga'ñ ajcxy, e coduḡiig x̄īi njugyp̄iḡipyich jad̄üg'oc co ñich anajty t̄i n'ögy.

32 Co Jesús jadu'n nigapxy ñim̄iydacy hūadz hūadz nej yjada'ñyii anajty, chi Pedro huob̄ibz̄im̄y Jesús ahuingujc, chi ooy ojy. 33 Chi Jesús ñi'ijxhuimbijty ydiscípulos ajcxy, e ojy je Pedro, ñimay:

—Huinhuäctuutcih, miich Satanás. Com miich ca' mhuinma'ñ mbidägy nej Dios tzocy. Yi' janchtiy miich mhuinma'ñ'ajtpy nej jäy ajcxy tzocy.

³⁴ Huin'it Jesús huoomiñ yi' ydiscipulos ajcxy etz yi mayjäy, e chi nimay:

—Pen ji pinjaty xypanicxa'ñich, huen jäydigoydäy yci'mdzócin etz huen xypanicxich jabom jabom. Oy nej ytimyjadiy ytimy'ayoohuipy. Jadu'n nipaady nej jihuiy ajcxy anajty mgruudz mgab'iccixy, etz naygiyéjigixy ma yi ó'cin huen ytimyñéjity müd ñch ycixpi. ³⁵ Huenpinjäy huídibi ca' yega'ñ yi yjugy'ájtín ma yi ó'cin müd ñch ycixpi, hue' je' yajtigoyamy yi'yjugy'ájtín. E huenpinjäy huídibi yegamy yjugy'ájtín ma yi ó'cin müd ñch ycixpi etz ñch y'ayuc oybi ycixpi, hue' je' ypadamyb yi jugy'ájtín huídibi ca' cixipy tigoyipy ni minaa. ³⁶ ¿Ti oy'ájtín yi' co tüg jäy y'ocnayaajpadíyb yi meeñ etz mic'ájtín (huídí yajpaatp ya ñaaxhuiñybi) e y'alma yjugy'ájtín cixipy tigoyipy tügcíy? ³⁷ ¿Jadu'ñyi jëb jäy y'alma yjugy'ájtínoccojuyi? Nigi tzoohuin müdíty jäy ajcxy y'alma yjugy'ájtín, ca' jac ti. ³⁸ Huentimpínity yi huídibi xymidzo'ydúnibich yi n'ayucich ndiy'ájtich ma yi pocyjäydic yhuinduu huídibi tzinaayb cham ma jada naaxhuiñybi. Pues nañ jadu'n ñch, je jäy huídibi tsoon tzajpjoty, nmidzo'ydúnibich yi jadu'mbi jäy co ñch anajty nhuimbity ya naaxhuiñybi müd ñch nDeedy, je Dios Teedy, ymic'ajt y'oy'ajt etz müd tüg'óciy yi may'ángeles ajcxy tudägypi.

9

¹ Jadu'n Jesús yjacmīnañ:

—Janch tiy'ajt jadu'n nej ñch miich ajcxy cham nimāy, co nijējity miich ajcxy huīdibi cham ma ñch nhuinduu, ca' m'ōgaangixy, ixti cooni ajcxy jayijp m'ixipy je Dios y'ané'mīn etz ymic'ajt.

Co Jesús ñinīcx yajtigajch

² Co tuctujc xii naxy, chi Jesús mīd tzoōñ Pedro, Santiago etz Juan, e mīdpa'ttigīy ma tūg mijcop ma tūg it ooy ycīxity. E jīm copcīxy Jesús ñinīcx naygojtigajtzni ma Pedro ajcxy yhuinduu. ³ Chi Jesús yhuīt oy y'ahuimbity janch poob, e janch adīcxp. E ni pīn jadu'n yhuīt cayajhuāch janch poob jadu'n nej je' anajty yhuīt mīdity. ⁴ E chi oy nayguēxīgīyī ma ajcxy yhuindu Elías etz Moisés. Elías etz Moisés mīydacp anajty ajcxy mīd Jesús. ⁵ Huin'it Pedro nimay Jesús:

—Huīndzīn, janch oy jadu'n co ñch nyáajity. N'occojyīch ajcxy tugīg tijcquemy: tūg miich mje'; tūg Moisés yje'; etz tūg Elías yje'.

⁶ Com Pedro, Jacobo etz Juan ooy anajty chīgīyīgīxy, paady Pedro ca' anajty nejhuīy ti ycapxyp. ⁷ Tīm huīn'ītiy tūg joc yajnīdīgoy je' ajcxy, e mīdooy ajcxy ayuc jocjoty, e je ayuc ymīnañ:

—Jada je' ñch n'ung, huīdibi ooy ndzocyīch. Mīdo'mbīc miich ajcxy Jesús y'ayuc.

⁸ E tīm huīn'ītiy Pedro, Jacobo etz Juan ajcxy yujc'ijxy, e yja'ijxhuīdijty ajcxy, e ca' ni pīn ma ocjac'ijxni, jēda'ajty Jesús naydūgpajc.

⁹⁻¹⁰ Tī anajty choongixy copcīxy, e cidacp anajty ajcxy, co Jesús nimay Pedro, Jacobo etz Juan, co

ca' huaad yajm̄dm̄ydaaccixy pinjaty hūidibi ajcxy anajty ti íjxcixy, íxti cooni ñch, je jāy hūidibi tzoon tzajpjoty, n'ögibich etz njugypigipyich jadüg'oc. Pedro, Jacobo, etz Juan ca' yjacm̄ydägy m̄id jacpinjaty hūidibi anajty ti íjxcixy. Per ooy ajcxy huinmay etz naym̄dm̄ydáacigixy miñ xyipy ti Jesús ytijamy co ym̄inañ: “N'ögibich etz njugypigipyich jadüg'oc.” ¹¹ Huin'it ajcxy Jesús y'amidooy:

—¿Na'amy co yi escribas ym̄ina'ñ co yi Elías hūidibi chinay jecy'ajty jayijp miina'ñ ca'ydi je Cristo?

¹² Chi Jesús y'adzooy:

—Tiy'ajt jadu'n co miñ jaybety ma Dios ñecy jecy'ajty co Elías yhuimbidity jacjayijp ca'ydi je Cristo, e yaj'oyiydähuiipy huinjemybi tüg'óciy m̄id Dios ycixpi. E nañ tiy'ajt jadu'n co jaybety ymiñ ma Dios ñecy co je Cristo, je jāy hūidib tzoon tzajpjoty, yajnaxa'ñ ayo'n etz tzaachypi etz mayjäy ca' y'ixa'nñby. ¹³ Hich miich ajcxy nimaayb co je Elías ti je' yhuimbity ya naaxhuiñ, e je mayjäy ti túngixy m̄id Elías nej anajty tim tzójcixy. E cuyduñ ajcxy nej jaybety miiñ ma Dios ñecy m̄id Elías ycixpi.

Jesús yajtzögy tüg mutz'anäg hūidibi ca'oybi m̄id

¹⁴ Co Jesús, Pedro, Jacobo etz Juan yhuimbity ma je jacjadyii Jesús ydiscípulos ajcxy anajty ti yhuim̄y, chi ajcxy ijxy mayjäy jühuidity ma Jesús ydiscípulos ajcxy. Etz ijxy ajcxy nijëjity escribas hūidibi ayuc tzachyajtzibñyb m̄id Jesús ydiscípulos ajcxy. ¹⁵ E co je mayjäy íjxcixy nejhūiygixy co Jesús ti yhuimbity anajty, chi mic'amy ajcxy ninicxy Jesús poyigy,

e capxpoocxcixy, e may je' ajcxy ooy jihuüy huinmay. ¹⁶ Chi Jesús y'amidooy je mayjäy, nimay:

—¿Ti ayuc miich ajcxy mdzachyajyomyb mïd ñch ndiscípulos ajcxy?

¹⁷ Chi nidüg je jäy ajcxy y'adzooy:

—Huindzin, ti nmïdmiiñ ñch nmang huídibi ymïd ca'oybi, e je ca'oybi ti yaj'umïyii. ¹⁸ E janam jadzojc je ca'oybi yajyachyii yajquïdyii ñch nmang, e oy cäy naaxcíxy, e ooy y'aa'opy ypidzimy, e nañ jadu'n oy ytïtz queety etz ñinïcx janch ögy yhui'my. Ti nbïjctzoyïch may'ajt mïd miich ndiscípulos ajcxy co huen yajpidzimgixy je ca'oybi ma ñch nmang, e ca' ajcxy ymadacy ñicxy yajpidzimgixy.

¹⁹ Jesús nimay je mayjäy:

—Miich ajcxy huídibi jugy'ajtp jadachambi xii tiempo huídibi ca' mijpidägy Dios y'ayuc, ¿naag xii naag po' ñch njac-hui'mmïhuibich mïd miich ajcxy? ¿Naag xii naag po' n'ocmïmecxtuguipïch miich ajcxy? Mïdmiin yi mmang ya ma ñch nhuinduu.

²⁰ Chi ajcxy mïdmiñ je pa'mjäy ma Jesús yhuinduu. E co je ca'oybi ijxpaady Jesús, chi mic'amy yajyach yajquïdy je pa'mjäy, e chi oy ciday naaxcíxy, e ooy yajch yquïdy, yajpidzimy ooy y'aa'opy ma y'ahuac. ²¹⁻²² Jesús y'amidooy je pa'mjäy yteedy:

—¿Minaag jimïjt cujc yöy maabi mmang ypa'mbety?

Chi je ungededy y'adzooy:

—Ma'xung anajty co pa'mbedyii. Canaag'oc je ca'oybi yajyachyii yajquïdyii ñch nmang, ixti ti oy ycogïdahuüy jïnjoty etz nïjoty. Je ca'oybi canaag'oc jayaj'ögy ñch nmang. Pen miich mïd

tzöc'ajt mic'ajt jaydëb xypubedipyich, tun may'ajt pa'ayoogich etz pubejtcich.

23 Chi Jesús y'adzooy nimay je pa'mjäy yteedy:

—Pen miich mibijcpi, ca' ti chípity ma pin mibijcp.

24 Mic'amy je pa'mjäy yteedy mic ycapxy yminañ:

—Nmibijcyich, pubéjtcich nej huaad jacmij nmibicyich.

25 E co Jesús ijxy co nīgi mayjäy chach ymiñ poyigy ma yi', chi ix'ojy je ca'oybi, e yminañ:

—Miich ca'oybi huídib ti yajhui'my jada pi'c'anäg uum etz nat, ñch miich yam n'ane'myb: “Pidzim ma yi pa'mjäy, e ca' mjactigihuipy ma yi yjot yhuinma'ñ jadüg'oc.”

26 Jayijp je ca'oybi yaaxqueecy janch mic, yajyajch yajquidy je pa'mjäy. Co jadu'n tuñ, chi ypidzimy. Je pa'mjäy oy ñinïcx yhui'my nej jihuïy ti y'o'cni. Je mayjäy huídibi anajty ajcxy jim huindicxp yminaangixy:

—Ti ayooob y'ögy.

27 Chi Jesús majtz je pa'mjäy yci', e yajpidigy e huin'it je pa'mjäy ytinayigy mic oy.

28 Co Jesús ytigïy ma tüg tijc, chi je' ydiscípulos ajcxy y'amidou ameech, minañ ajcxy:

—¿Na'amy co ñch ajcxy ca' ti nmadägyich nej nyajpidzimip ñch ajcxy yi ca'oybi?

29 Chi Jesús y'adzooy:

—Yijibi ca'oybi ca' yi' huaad ypidzimy jadu'ñyi. Hue' janchtiy copicy mibijctzou Dios mictägy, e huin'it ypidzimipy je ca'oybi ma je pa'mjäy. Ca' jac

ni nej huaad ypidzĩmy yĩ jadu'mbi ca'oybi, jėyi co Dios nmĩbijctzoohuĩm n'ĩjtim ayuu.

Jesús capxpĩdzĩmnĩp jadũg'oc co y'õga'ñ

³⁰ Chi Jesús mĩd yĩ' ydiscĩpulos ajcxy choñ ma je jĩmbĩ it, e yajyõyñajxtay ajcxy Galilea naaxjot. Jesús ca' anajty tzocy co je mayjāy ñejhuĩhuĩyb ma yĩ' ñĩcxy. ³¹ Com Jesús hue' anajty yaj'ixpĩcy yĩ' ydiscĩpulos ajcxy, co ooy ycopĩcyĩty co yĩ jāy huĩdĩbi tzoon tzajpjoty, yajcĩyegĩpy ma yĩ ymĩdzip, etz yaj'õgĩyb, e co anajty tĩ y'õgy codugĩg xĩĩ jadũg'oc yjugypĩgĩpy. ³² Jesús ydiscĩpulos ajcxy ca' huĩnjĩhuĩy anajty Jesús y'ayuc, e nañ jadu'n tzigĩyb anajty ajcxy co Jesús yaj'õjĩp, paady ca' ajcxy amĩdoy nej huĩmbĩdzĩmy yĩjũbi ayuc.

¿Pĩn je' nĩgĩ jacmĩjĩp?

³³ E Jesús mĩd ydiscĩpulos ajcxy oyjāty jĩm Capernaum. Co ajcxy ytĩjctĩgĩy, chi Jesús yaj'amĩdoy ydiscĩpulos ajcxy, nĩmay:

—¿Tĩ ayuc mĩĩch ajcxy naymĩdmĩydaacĩgĩxy jĩm ma anajty mdũyõygiĩxy?

³⁴ Per amonday ajcxy, com jėgĩxpĩ co anajty ajcxy ooy tĩ ñaymĩdmĩydaacĩgĩxy tũyõyjoty co pĩn jada' ajcxy nidũgtĩ ocjaccopĩcyĩp. ³⁵ Huĩn'it Jesús y'ixtacy, e chi mĩjhuoy je nĩmajmetzpi ydiscĩpulos ajcxy, chi ajcxy nĩmay:

—Pĩn nayyajnaxaanĩp mĩj, huen ity nej jĩhuĩy ca' ytĩjĩty e huen capxmĩdoy ymĩgũgtĩj.

³⁶ Chi Jesús tzenĩgy tũg pĩ'c'anāg, e chi pĩdacy cujc'amy ma yĩ' ydiscĩpulos ajcxy. Chi tzenĩgy jadũg'oc, e nĩmay ajcxy:

37 —Pín cöbıjc tügpajc pi'c'anäg jadu'n nej jada pi'c'anäg miid ñch nxıı ycıxpi, ñch yi' anajty ti xycöbıcyıch, e pın ñch xycöbıjcpıch, ca nan ñch anajty naydügpajc ti xycöbıjcyıch, nañ jadu'n anajty ti cöbıcy huıdı ti xyquejxıch.

Pın ñch ajt xycamıdzip'ájtım, ñch ajt je' mıd y'ıty

38 Juan Jesús nimay:

—Huındzın, ti ñch ajcxy n'ıjxpaady tüg jäy co ca'oybı yajpıdzımy miid miıch mxıı, e ti ngapx'aducyıch miid co ca' yi' ñch ajt xypahuıdıjtım.

39 Per Jesús ymınañ:

—Ca' mgapx'adugıpy yi' jadu'mbı jäy, com huenpıny huıdıbı mıjhuınma'ñ tumb miid ñch nxıı, ca' yi' jıbıc xyñıgapxıch. 40 Com yi' huıdıbı ajt ca' xymıdzip'ájtım, yi' yi' miid ñch ajt nbıdzımım. 41 Janch janch ñch miıch ajcxy jadu'n nımäy co huenpınjäy huıdıbı ıxyıpy miıch ajcxy xyajñı'uucp tüg vaso nıı miid co miıch ajcxy ti mmıjñıcxpety je Cristo, yi' jadu'mbı jäy ypadamy yi' y'oy'ájtın ma Dios.

Je huıdıbı ooy ycojotmáıty co nıcy nbocycáhuım

42 Huenpıny huıdıbı jıbıc-huınma'ñ mıbıdзіmb, e yajpocycáy yi' jadu'mbı pi'ctıjc huıdıbı ajcxy xymıjñıcxpejtpıch, jac'oy ıxyıpy co yi' jadu'mbı jäy ytimyñayyajyöcxodзіyıı tüg paandzaa etz ñayñajtzıbıbıhuııyb mejyoty. 43 Pen miıch mgı' xyajtundıgoyamb jac'oy co mdım'ıxpuxıpy, com jac'oy co mdıgıhuıpy ma yi' jugy'ájtın huınıxıbı cıduc, ca'ydı co Dios xypıdägıp miid metz mgı'

jiiby j̄in̄joty ca'oydactuuby, ma ȳi j̄in̄ ni camina ycap̄ich. ⁴⁴ Jiiby ca'oydactuuby ȳi ucxyting ca' y'ögy etz ni j̄in̄ ycap̄ich nicaminaax̄ii. ⁴⁵ E pen miich ȳi mdecy xyajpocycāhuamb, ixpux, com jac'oy co mdiḡihuip ma ȳi jugy'ájt̄in̄ huinix̄ibi tecytuc ca'ydi co mdiḡihuip m̄id metz mdecy jiiby ca'oydactuuyb, ma ȳi j̄in̄ ni camina ycap̄ich. ⁴⁶ Jiiby ca'oydactuuby ȳi ucxyting ca' y'ögy etz ni j̄in̄ ycap̄ich ni caminax̄ii. ⁴⁷ E pen ȳi mhuiin t̄üg xyajpocycāhuamb, tim yajpidzim, jac'oy ȳi' co mdiḡihuip ma ȳi Dios y'ane'mdac m̄id t̄ügpajc mhuiin, ca'ydi co mdiḡihuip ca'oydactuuby m̄id metz mhuiin. ⁴⁸ Ma ȳi ucxyting ni caminax̄ii yca'ögy etz ȳi j̄in̄ ni caminax̄ii ycap̄ich, ⁴⁹ e ma nidüg'óciy ñi'cāgooda'ñ̄ j̄in̄ xut j̄in̄ ye'n tim jadu'n nej jāy tzüch caan x̄iducy. ⁵⁰ Ȳi caan ooy ȳi' y'öyity, pen ym̄id x̄ücx'ájt̄in̄. Co je caan ytigoy yx̄ücx'ájt̄in̄, ca' ji ni ti huidibi j̄eb̄ m̄id nyajx̄ücx̄iiȳim. M̄id'ájt̄ic̄ix̄ iich n'ayuc ma mjot mhuinma'ñ̄, jadu'n iich n'ayuc nipaady nej caan, e tzina' miich ajcxy jotcuic m̄id mm̄iḡügt̄ijc nidüg nidüg.

10

Jesús yaj'ixpicy m̄id co jāy ytöxyijc ixmach

¹ Chi Jesús chooñ jim Capernaum, nicxy jim Judea ñaaxjot ma je it lugar Jordán mijñi n̄inaxy x̄i ypidzimy'amy. E mayjāy ooy ñayyöymujci ma Jesús anajty yajpaady. E Jesús yaj'ixpicy je mayjāy jadu'n nej anajty yaj'ixpicy'adyii. ² Chi nij̄jity fariseos ajcxy ñicxy ma Jesús anajty yajpaady. Hue' ajcxy yhuinma'ñ̄ pidaaccixy co anajty Jesús tzu'ixaangixy. Chi ajcxy y'amidooy, pen huaad

tüg yëydijc ixmach ytöxyijc. ³ Chi Jesús y'adzooy, yminañ:

—¿Nej Moisés ymina'ñ ma yi' ycötújcín ñecy?

⁴ Chi je fariseos ajcxy Jesús y'adzooy:

—Moisés cötújcín yecy co tüg yëydijc jëb huaad ixmach ytöxyijc, e möhuiipy ñinecy ñidiy'ajt co nej ñay'ixmáztzigixy, e jadu'n anajty ti y'oyiy nej jëb yi' ytöxyijc ixmach.

⁵ Chi Jesús yminañ:

—Moisés cojaay jada ycötújcín mïid miich ajcxy ycixpi, co ooy miich ajcxy mdzaccapxycómídodaaccixy ca' mgapxymídohuaangixy Dios. ⁶ Per co je naaxhuiñybi chondacy, co Dios oga'n yajcojy tüg'ócüy tijaty huidi ji'ajtp, chi Dios yajcojy yëydijc etz töxyjäy. ⁷ E je yëydijc ixmadziipy ytajyteedy etz pudigihuiipy yi' ytöxyijc. ⁸ E je yëydijc etz ytöxyijc tú'ciy idaangixy. Paady je yëydijc tüg mucy yajpaady mïid ytöxyijc. ⁹ Com yi' huidibi Dios ti huijtz mucy, ca' ni pïn huaad huijtzhuägy.

¹⁰ Co Jesús mïid ydiscípulos ajcxy yhuimbijt ma anajty ti yjëttáccixy, chi Jesús ydiscípulos ajcxy yajtihuimbijtcixy je ayuc huidibi anajty ti yaj'ixpicy ma je píjcín. ¹¹ Chi Jesús yminañ:

—Je yëydijc huidibi ti ixmach yi' ytöxyijc, e picy mïid huingbi, hue' yi' anajty ymidundigooyb yi' ytöxyijc huidibi mïid jayijp ypijcy. ¹² Nañ tim jadu'n co tüg töxyjäy ixmach je yëydijc huidibi mïid ti ypicy jayijp, e ypijctigach mïid huingbi yëydijc, hue' ymidundigooyb je yëydijc huidibi mïid ti ypicy jayijp.

Jesús conucxy pi'ctijc

13 Je huin'it tiempo jāy ajcxy m̄id miñ pi'ctijc ma Jesús, jaydēb c̄in̄xajy etz conuucx̄ip. Co Jesús ydiscípulos ajcxy jadu'n ijxy co jāy ajcxy nim̄ijhuāgy Jesús m̄id ajcxy ypi'c'ung, chi je' ydiscípulos ajcxy ix'ojoy je jāy ajcxy. 14 Co Jesús jadu'n ijxy nejhūiyy nej yī' ydiscípulos ajcxy y'id̄ich, chi ojoy ajcxy, ym̄inañ:

—Ooy y'óyity co je pi'ctijc ajcxy xyñim̄ijhuāgyich, ca' miich ajcxy mgapx'aducy. Com yī jāy ajcxy hūidibi yajpatp ma Dios y'ané'm̄in, jadu'n ajcxy nipaady nej pi'ctijc. 15 Janch iich miich ajcxy nim̄äy co pinjaty hūidibi ca' cōbiga'ñ Dios y'ané'm̄in, jadu'n nej pi'ctijc cōb̄ijccixy Dios y'ané'm̄in, hue' yī jadu'mbi jāy ajcxy ca' ytiḡihua'ñ ma yī Dios y'it lugar.

16 Chi Jesús am̄inenmujctay je pi'ctijc ajcxy, e chi c̄in̄xajiy etz conuucxcixy.

Tüg mutz'anäg comeeñybi ym̄iydägy m̄id Jesús

17 Co Jesús chooñ jadüg'oc, chi ñimiini poȳigy tüg yēydijc, ycojxtinay'ahūiy ma Jesús yhuinduu, e ym̄inañ:

—Miich, oybi Huindzin, ¿ti huaad ndunipyich jigix jēbi nbadipyich jugy'ájtin hūidibi ca' ycixipy ytigoyipy?

18 Chi Jesús ym̄inañ:

—¿Na'amy co xyñim̄äyich co oy huindzin iich? Dios tügpaic óyip, ca' jac ni pin. 19 Miich mnejhuiyb Dios ycótújc̄in hūidibi jadu'n m̄inaam: “Ca' mm̄igapxtigoyip tōxyjāydijc; ca' mjāyyaj'ōgipy; ca' mmeedzip; ca' m'̄indaacip; ca' pin mhuin'̄inip; etz myajm̄ij'adip mdaj mdeedy.”

20 Chi je jāy Jesús nim̄ay:

—Huindzin, ti nguydundäyich jadyaab cötújcín ajcxy maabi ñch nbi'c'atyich.

²¹ Chi Jesús huindixpejty je yëydijc mïid tzójcín jihuñyín, e chi ñimay:

—Per jactigoy'ijtni jadügnax. Nïcx toog tüg'óciy huídijaty miich mmïid, etz mo' yí ayoobtjic. Co jadu'n mdunipy, chi mbaadipy oy'ájtín jüby tza-ppjoty. Co jadu'n mdooctáhuipy tijaty miich mïid, chi minip jadüg'oc ma nyajpaadyich, e xypañicxibich, e mnaybidägñib cixyjot huinjot oy nej mdimyjadipy mïid ñch ycixpi.

²² Co jadu'n je yëydijc midoy nej anajty Jesús ti ñimäyii, chi yhuí'my taj may e co ñicxni, chi ooy ytajy ymay, com hue' je' anajty ooy ycomeeñity.

²³ Co Jesús jadu'n ixyc co je comeeñybi taj may yhuimbijtni, chi huindixpejty je' ydiscípulos ajcxy huídibi tinaayb jühuídity ma yí, e ymíñañ:

—Ooy chachtzípity co tüg comeeñybi ytigíhuipy ma Dios y'it lugar.

²⁴ Jesús ydiscípulos ajcxy ooy tzachhuinmay'ahuídity mïid jada ayuc nej Jesús anajty ti ymíñañ. Paady Jesús yjacmíñañ jadüg'oc:

—Miich ajcxy migügtjic huídibi ooy ndzocyich, ooy chachtzípity co ytigíhuip ma Dios y'ane'mdac tüg comeeñyñy huídibi tzachnijot'ajt ycomeeñ'adii. ²⁵ Nígi chípity co tüg comeeñ jáy ytigíhuip ma Dios y'ane'my, ca'ydi co tüg camello ñaxipy ma tüg xu'ñ'ix yxútity.

²⁶ Co jadu'n ajcxy midoy nej Jesús ymíñañ, chi ooy ajcxy yhuinmay'ahuídijty, e nayñimáayigixy miñ xyipy:

—Pen janch tiy'ajt jadu'n, ¿pɪnjäy jada' huaad jëb y'alma ñëdzögipy?

²⁷ Je huidibi jäy ajcxy ca' ni minaxii huaad ca' yaj'oyïy, Dios yi' yaj'oyihuip, com mïid Dios ca' yi' ni ti chípity.

²⁸ Chi Pedro yminañ:

—Huindzin, occuendtun, ìch ajcxy ti n'ixmajztäyich tüg'ócïy tijaty anajty nmïidich, e ìch ajcxy nbanicxpïch miich.

²⁹⁻³⁰ Chi Jesús y'adzooy, minañ:

—Janch tiy'ajt nej ìch miich ajcxy nimäy co huenpínity huidibi mïid ìch ycixpi ti ixmach ytïjc, ti ixmach y'uch ymïgüg ajcxy etz ytaj yteedy, etz ytöxyïjc, etz y'ung ajcxy, etz nañ jadu'n ti ixmach ycam ìch ycixpi, etz ìch n'ayucich etz mïid Dios ytïy'ajt ycixpi, yi' ypadamy nïgi oy'ájtïn ya naaxhuiñ, ixti ypadamy mïgo'px jadu'ñyi ytïjc ajcxy, y'uch ajcxy, ytaj ajcxy, y'ung ajcxy, etz ypadamy nïgi ymïj cam, mïid tzaachypi mïid ayo'n mïid ìch n'ayuc ycixpi. Etz nañ jadu'n ma je xii tiempo huidibi mimb cidacpi ypadamy jugy'ájtïn huidibi ca' ycixipy ytïgoyipy. ³¹ Ji yajpaady ya naaxhuiñ nijëjity jäy huidibi cömay ijtp, e co yjäty ajcxy tzajpjoty, chi ca' ajcxy cömay ida'ñ. Nañ jadu'n ji yajpaady ya naaxhuiñ nijëjity huidibi ca' cömay y'ity, e co ajcxy yjädiipy tzajpjoty, chi jiiby ajcxy cömay y'idipy.

Jadüg'oc Jesús capxpïdzïmnïp co y'öga'ñ

³² Jesús mïid ydiscípulos tüyöyp anajty ajcxy, hue' anajty ypättigïygixy jim Jerusalén. Jesús jayïjp anajty ñicxy, e je' ydiscípulos ajcxy etz nañ jadu'n mayjäy panicxy anajty ajcxy Jesús. Je Jesús

ydiscípulos ajcxy ooy chachhuinmay'ahuídjtcixy, e jacjadyii jáy huídibi anajty ypanicxy Jesús ooy ajcxy chigiiygixy. Chi Jesús huodzooñ abicy je majmetzpi ajcxy, e yajmüdmíydactay je' ajcxy jadu'n nej ytuna'ñyii yjada'ñyii jim Jerusalén co anajty ajcxy jim yja'tcixy. ³³ Jesús je nimajmetzpi nimay:

—Miich ajcxy m'ijxpy mnejhuüyb co nnícxim cham jim Jerusalén. E jim Jerusalén, üch je jáy huídibi tzoon tzajpjoty, nyajcüyega'ñich mach ma yi Teedy mïjtungmüdpi, etz ma yi escribas ajcxy. E chi ajcxy ane'min pidäga'ñ co huen xyaj'öcixich. Nañ jadu'n xycüyegaangixich mach ma yi' ajcxy huídibi ca' yjudiojäyity. ³⁴ Yi' ajcxy xyñixigipy xyajxigibych, xyhuobipyich ajcxy müid coochac, xyhuindzuj xyjijptzújibich ajcxy, e xyaj'ögibich ajcxy. Codugüg xii maabi anajty xyaj'öccixyich, chi njugypigipyich jadüg'oc.

Jacobo etz Juan pïjctzóogixy tüg may'ajt

³⁵ Huin'it Jacobo etz Juan, yi Zebedeo ajcxy ymang, nimijhuägy Jesús, nimay:

—Huindzin, ndzojcpyich ajcxy co mdunipy may'ajt jadu'n nej yam nimaaygixy.

³⁶ E Jesús yminañ:

—¿Ti mdzojcpy co ndunipich müid miich ajcxy ycixpi?

³⁷ Chi ajcxy yminañ:

—Tun may'ajt co anajty mbaady yi m'ané'min etz m'oy'ájtin, xymöhuibich yi mij tung ma m'ané'min jaydeb n'ñähuibich ma miich mmijc. Nidügti üch ajcxy n'ñähuipy a'oy'amy ma miich etz jadüg anajty'amy.

³⁸ Chi Jesús nimay Jacobo etz Juan:

—Ca' miich ajcxy mnejhuïy ti ti mbijctzoogixy. ¿Nej myajnaamyb miich ajcxy je tzaachypi ayo'n huïdibi nyajnaamybich, jadu'n nej jihuiy m'üga'ñ ajcxy ïch n'ügy e mbaada'ñ ajcxy ïch nniibéjtin?

³⁹ Jacobo etz Juan y'adzooy:

—ïch ajcxy nmimadägibich mïnaxipyich nyajnaaxyich ajcxy yi tzaachypi huïdibi mminaxamyb myajnaamyb.

Chi Jesús yminañ:

—Janch tiy'ajt jadu'n nej miich ajcxy mina'ñ co mminaxaangixy myajnaangixy yi tzaachypi jadu'n nej ïch mminaxaamyich nyajnaamyich yi tzaachypi, tim jadu'n nej jihuiy m'ügaangixy ïch n'ügy, e mbadaangixy ïch nniibéjtin. ⁴⁰ Per ca' ïch cötújcïn nmïdidyich co ïch miich ajcxy nbidägipy tungmïd, co myajpaadip tüg ma ïch nmïc a'oy'amy, e jadüg anajty'amy. Hue' janchtiy Dios Teedy ymïd ni'ixi' pinjaty ti huin'ixy jaydëb yajnícxip je mïjtung ma ïch n'ané'mïn.

⁴¹ Co je jacjadyii Jesús ydiscípulos ajcxy nejhuïy jadu'n nej Jacobo etz Juan may'ajt pijctzoy ma Jesús, chi ajcxy ooy mïjotmäty Jacobo etz Juan.

⁴² Per Jesús huomiñ yi jacjadyii ydiscípulos ajcxy, e yminañ:

—Jadu'n nej miich ajcxy mnejhuïygixy, yi jäy ajcxy huïdibi mïjtungmïd ma je maybi naax cajp, mic ajcxy ane'my je naax cajp. Nañ jadu'n yi' ajcxy huïdibi mic'ajt mïd ma je maybi naax cajp, mic ajcxy ane'my je jäy ajcxy. ⁴³ Per miich ajcxy ca' mjadú'nity nej mïjtungmïdipi ma je maybi naax cajp. Pinjaty ma miich ajcxy mïjtung

yajnicxaamb, copicy ñaybidägiyb nej tüg tumbi. ⁴⁴ Pinjaty miich ajcxy huidibi nigohuajc'ajtp, copicy ñaybidägiyb nej tüg tumbi. ⁴⁵ Com ñich nañ jadu'n, je jäy huidibi tzoon tzajpjoty, ti nmiiñich ya naaxhuiñ jaydëb nbubedipyich yi mayjäy ajcxy, e ca' nan yi mayjäy ñich xypubedipy. Ti nmiiñich jaydëb nyegipyich njugy'ájtín ma yi o'cin. E co jadu'n nyegipyich njugy'ájtín ma yi o'cin, chi ngohua'na'ñich yi jäy ajcxy y'alma.

Jesús yajtzögy Bartimeo huidi anajty huíntzíp

⁴⁶ Chi oy jäty Jesús miid ydiscípulos ajcxy jim Jericó. E co Jesús tzoofñ Jericó ytübijcy jadüg'oc, chi yi' ydiscípulos ajcxy etz janch mayjäy ñíxcixy anajty miid Jesús. Co ajcxy ycajp pidzimy, chi tüba'ay anajty yajpaady tüg huíntzípí huidibi limosna anajty ypijctzooyb jabom jabom. Hue' anajty yxii Bartimeo, e Timeo anajty xiijity yi' yteedy. ⁴⁷ Co Bartimeo nejhuüy co Jesús je Nazaretpí najxp anajty ma je tü'aa, chi mic yaaxqueegy ymíñañ:

—Jesús, David y'ap y'oc, tun may'ajt ñich pa'ayoog.

⁴⁸ Chi je mayjäy ajcxy ogy je huíntzípí, nimay ajcxy co huen amofñ. Per je huíntzípí niği ymínan'idích:

—Miich, David y'ap y'oc, tun may'ajt ñich pa'ayoog.

⁴⁹ Chi Jesús ytinayxijpy, e ymíñañ:

—Huomiingix yi huíntzípí.

Chi je jäy ajcxy oy yajtzoongixy je huíntzípí, nimaaygixy:

—Jotcugi', e pidíg, com Jesús xyaaxtzoob.

50 Chi mic'amy je huintzpi, najtz'oxi'y je ñibe'ñ, chi ypidi'gy, e ninicxy Jesús. 51 Chi Jesús je huintzpi y'amidooy:

—¿Ti mdzojcpy nduni'pyich miid miich ycixpi?

Chi je huintzpi yminañ:

—Huindzin, ndzójcpyich co xyajhuindicxi'gibich.

52 Chi Jesús je huintzpi nimay:

—Jëb mnicxy ma mdi'c. Com ti xymibicyich, paady ti mhuindicxi'gy.

Tim huin'it je huintzpi yhuin'oyi'y, e yhuindicxi'gy, e panicxy Jesús co ytubi'jcy jadüg'oc.

11

Jesús yti'gy jim Jerusalén

1 Co Jesús etz je mayjāy o'yá'tcixy huington ma je Jerusalén cajp ma yajpaady mejtz mutz cajp huidi xi'ijpy Betfagé etz Betania, huington ma je cop huidibi xi'ijp Olivos, chi Jesús quejxy metz ydiscípulos huen nicxy jayijp. 2 Jesús nimay je metzpi ydiscípulos:

—Nix miich ajcxy ma yijimbi cajp huingtonbi. Co jim mjädipy, chi mic'amy mbaadip tüg burro ycoxóchity huidibi ca' pin yaj'iñayñi chambaad. Coguejtuut'cix je burro e yajmiingix ya ma ich.

3 Pen jim pinjaty xy'amidoogixy: “¿Na'amy co mmidzonaangixy yi burro?” Chi miich ajcxy mnimähui'py: “Je Huindzin (Jesús) yajtunamyb tzojc, e yajhuimbidamy mic'amy.”

4 Chi je metzpi ydiscípulos ñicxy ma je cajp huingtonbi, e oypaat'cixy tüg burro ycoxóchity huington ma tüg tijc'aguu. Chi ajcxy coguejtuuty je burro.

⁵ Ycoguejtuutyp anajty ajcxy je burro co nijëjity jäy jim huingon ymïnañ:

—¿Ti mdungixyp? ¿Na'amy co mgoguejtuutcixy yi burro?

⁶ Chi je metzpi Jesús ydiscípulos je jäy ajcxy yajmïdmïydacy Jesús y'ayuc nej anajty ti ñimäyïi. Je jäy ajcxy ymïnaangixy co jëb yajníxcixy je burro. ⁷ Mïc'amy ajcxy mïja'ty je burro ma Jesús yajpaady. Je Jesús ydiscípulos ajcxy jïbe'ñ je burro ajcxy mïd yjocxhuit, chi Jesús yaj'iñay je burro. ⁸ Mayjäy ajcxy ooy yëby yhuit tügüjc ma Jesús anajty ñaxa'ñ, e jacjadyïi jäy pujxy ajcxy quipy'aacx, e pïdaaccixy tügüjc.

⁹ Je mayjäy huïdibi anajty ajcxy nicxp jayïjp etz axam ma Jesús, chi ajcxy ytigïy capxp mïc, ymïnaangixy:

—¡Hosana! ¡Gloria a Dios, ooy ycömáyity Dios! Huen capxpaady y'idïpy jada yëdyjc huïdibi mimb mïd yi nHuïndzin Dios yxï etz ymïc'ajt. ¹⁰ Huen capxpaady y'idïpy je ané'mïn huïdibi jada Jesús yajtzondacp cham. Jada je' je ané'mïn huïdibi nmïj'ap nmïjteedy David anajty ymïd. Hosana, huen je tzajpjoty tzïnaayb ajcxy ïbaatcixy capxpaatcixy jada mïj'ane'mbi.

¹¹ E jadu'ñyi Jesús ycajptigïy jim Jerusalén, e ytigïy tigoty ma Dios ytïjc. Co huïndïxtay tüg'ócïy tijaty jïby tzajtigoty, chi chooñ jïby, e ñicxy jim ma je cajp huïdibi yxï Betania. Chi Jesús je majmetz ydiscípulos ajcxy mïdnïcxy.

Jesús capxpocy je hïguerï ca'pi anajty ytïm

¹² Je com jabom co ajcxy chooñ jim Betania, chi Jesús yuböccooti. ¹³ Chi Jesús ijxpaty jïguëgy tüg

higueri ooy anajty yco'aayity. Chi Jesús ñicxy ma je higueri yajpaady, ixa'ñ pen ymïd ytïm. Co Jesús ymech ma je higueri, chi ijxy co je higueri ca' anajty ytïm mïdity, jëyi mïdity anajty y'aay, com ca' anajty ni tiempity mina higo ytïm'aty. ¹⁴ Chi Jesús migapxy je higueri ñimay:

—Jadu'n nej tiempo yjacnicxni, ni pin cajacpaadipy higo tïm ma miich.

Chi Jesús ydiscípulos ajcxy midoy nej Jesús ñimay je higueri.

Jesús quejxpïdzïmday ajuybi adoocpi ma Dios ytïjc

¹⁵ Co ajcxy oy yjady jim Jerusalén, co Jesús ytigiy jadüg'oc jiiby ma Dios ytïjc, chi Jesús yajpïdzïmday je ajuuybi adoocpi ajcxy jiiby tzajptigoty. Chi Jesús tijhuimbijtay je mesa ajcxy me je meeñ yajhuäcxpi ytuñ ajcxy. Nañ jadu'n tijhuimbijty je jäy ajcxy iñaybejt huïdibi muuxy toocp. ¹⁶ Jesús ca' anajty tzocy co pinjaty midigïhuipy juydoogy ma Dios ytïjc. ¹⁷ Jesús yaj'ixpijcpy anajty je mayjäy, e yminañ:

—Ma Dios y'ayuc necy Dios jadu'n yminañ: “Ëich ndïjc hue' je' tzajpcapxcapxtac ma tüg'óciy jäy ajcxy chooñ ma nidüg'óciy naax cajp ymiingixy Dios ojadajtp”, per miich ajcxy hue' yi' mhua'ñ meetzpitïjc.

¹⁸ Co ajcxy je teedy mïjtungmïdipi etz je escribas nejhuïy nej anajty Jesús ti y'idïch jiiby ma Dios ytïjc, chi ajcxy ooy ijxtaaygixy nej ajcxy jëb yaj'ögipy Jesús. Per ca' ajcxy yhuinma'ñybaady mic'amy nej yaj'ögipy, tzigïyb ajcxy mïd je mayjäy com je mayjäy ooy tzachjïhuïy huinmay jadu'n nej

Jesús yaj'ixpájcigixy. ¹⁹ Co oycoodzhyñi, chi Jesús ycajppidzimy.

Je higeri ytätzni

²⁰ Je com jabom Jesús mïd ydiscípulos ajcxy najp anajty tim jopyñi ma je higeri anajty ytinäy. E je higeri ti anajty ytätztay mabaad ytictz. ²¹ Huin'it Pedro jäymejtzcooty nej Jesús nimay je higeri, chi Pedro Jesús nimay:

—Huindzin, ix jada higeri huídibi ixiy mgapxpojç, ti yi' ytích.

²² Chi Jesús Pedro nimay:

—Mibic yi Dios. ²³ Janch ñich miich ajcxy nimäy, co ixypy pin migapxy jada huingtonbi cop, e nimäy ixypy: “Miich cop pidäg, e nicx cidäg mejyoty”, pen ca' ti mijotmetzcüy, e mibicy co jadaanip nej yi' ti ane'my je cop, chi jadu'n ytunüyb yjadüyb. ²⁴ Paady ñich miich ajcxy nimäy co tüg'ócüy ti-jaty miich ajcxy mbijctzooyb ma Dios, chi Dios xymöhuipy ajcxy huídibi ti mbijctzoogixy. Pen janch miich ajcxy mibicy co Dios ti xymooygixy ajcxy je huídibi ti mbijctzooyb. ²⁵ Co miich ajcxy mgapxtaaccixy, pen ca' oy m'ity ajcxy mïd tüg jäy, huinméxcix yi mmidzip tim jayijp, jigix jëbi Dios Teedy huídib jüby tzajpjoty xyhuinmeecxip miich ajcxy ma ti mdundigooygixy. ²⁶ Pen ca' miich ajcxy mhuinmecxy yi mmidzip huídibi ti xymidundigooygixy, ca' miich ajcxy xyhuinmecxa'ñ Dios Teedy huídibi yajpatp tzajpjoty.

Jesús je' ycötújin

27-28 Je huin'it tiempo Jesús miid je' ydiscípulos ajcxy yhuimbijty jim Jerusalén. E co Jesús ana-jty yhuidity tzajtigoty, chi nijëjity huindzindijc huidibi nigohuajc'ajtp anajty je teedytjic etz es-cribas ajcxy huidibi nijayduutpi Dios ñecy, nimiiñ ajcxy Jesús, e yminañ ajcxy:

—¿Pin cötújcín ti xymöy huidibi ti mduñ ya tzajtigoty? ¿Ma cötújcín ti mbaady co jëb m'ane'my ya tzajtigoty?

29-30 Chi Jesús yminañ:

—Ich miich ajcxy nañ jadu'n nyaj'amidohuamyb tüg ayuc. E pen mni'adzooyb ajcxy, huin'it ajcxy nyajnimähuiipy ma ich ti nbaady yi mic'ajt etz yi cötújcín, co jadu'n nduñich jiiyby tigoty ma Dios ytjic. ¿Pin yajniibjic Juan, je Bautista, co huen jäy yajniibety? ¿Dios, o naaxhuiñjyäy? Adzoogich ajcxy.

31 Chi ajcxy ytigiiy huinmay'ahuidijtpi, ñayñimáayigixy miñ xyipy:

—Pen minaanim co Dios tzajpjotypi ti yajniibicy Juan, chi Jesús xyñimáayimipy: “¿Nej co ca' miich ajcxy miibijcy Juan y'ayuc?” 32 Nañ ni ca' jëbi ich ajt nminaanim co jäy ajcxy ti quejxy Juan.

Com chigiiyb anajty jäy com ñejhuiyb anajty ajcxy co Juan je Bautista Dios anajty ytiy'ajt ymiid.

33 Chi ajcxy Jesús nimay:

—Ca' ich ajcxy nejhuiy pin ti yajniibicy Juan.

Chi Jesús yminañ:

—Ich nañ jadu'n ca' nnigapxañich pin ti xycötujcmöyich co jëb nduñich huidibi ndumyibich.

12

Je naymidúnipitjic jibicjäybi ajcxy y'ijxpejt

¹ Je huin'it xii Jesús jacmığapxy je mayjäy miid jihuimbit ayuc, yminañ:

—Ji yajpaady tüg yëydijc huıdibi camuuxy ti cojy ma ycam, e ti co'aguemy je camuuxy cam, e yaj'oyııy tügi tang ma huinmicxa'ñ je camuuxy. Nañ jadu'n je yëydijc tüg poch yajpidıgy ma ycamuuxy yaj'ixihua'ñ co cuent'aty. Co anajty ti ni'ixidäy ti a'ixidäy, chi ycamuuxy cam yejcy ajuyducy ma nijëjity tumbidijc. Chi chooñ viaje tumbi jıguëgy it. ² Je huin'it tiempo co yhuaad'ajtni je cosechi, chi je cogam quejxy tüg ytumbi jim ma je' ycam yajpaady, co hueen je tumbidijc yéjccıxy je cosechi, jadu'n nej anajty ti ycapxytuñ miid je' ajcxy. ³ Chi je cam tumbidijc ajcxy majch je cogam yquexyöyp, chi huinhuojpy jıjphuojpy ajcxy. Chi ajcxy quejxhuimbijty jadu'nyı, ni ti ajcxy camoy. ⁴ Chi je cogam quejxy jadüg ytumbi ma je ycam yajpaady. Chi tumbidijc ajcxy tzaagäch je mımetzpi quexyöyp etz yajtzachıy ajcxy ma ycohuajc, chi ajcxy ooy ogy oyñinej. ⁵ Chi je cogam jacquejxy jadüg ytumbi e ajcxy tumbidijc yaj'o'cy je midugııgpi quexyöpy. Chi je cogam jacım quejxy jadyıı ytumbi. Chi je tumbidijc ajcxy je cogam ytumbi huinhuojpi jıjphuojpi nijëjity, e nijëjity ajcxy yaj'o'cy.

⁶ Je cogam ymiid anajty tügpajc ymang huıdibi anajty ooy tzocy jıhuıy. Je' oy quejxcogıxıy ma je ycam yajpaady. Je cogam huinmay jadu'n co je tumbidijc ajcxy yajmıj'adııyb je' ymang. ⁷ Chi je tumbidijc ajcxy ñayñımaayı miñ xyıpy: “Jada

yëydijc je cogam jada ymang huidibi jë'adaanip je yteedy ypidägy. Tzoc yaj'ó'cim, e jadu'n je cam një'ájtím." ⁸ E jadu'n ajcxy majch je cogam ymang yaj'ögy ajcxy. Chi ajcxy yajpidzimy camjoty, e jibijptacy agajjixci'py.

⁹ Co Jesús jadu'n miydactay je jihuimbit ayuc, chi ymínañ:

—¿Ti ytunamyb je cogam miid je tumbidijc ajcxy? Hue' min ci'm ma je' ycam, e yaj'öctähuipy je tumbidijc ajcxy huidibi tundigoy. E yegipy pijctzoy je' ycam miid huingbi jäy ajcxy.

¹⁰ ¿Nej ca'ni miich ajcxy mgapxy yi Dios ñecy ma jadu'n ymínañ?

Je yëydijc huidibi je jäy ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tzaa oyjatypi huidibi je pojtzpidijc ca' ajcxy yajtuna'ñ, e je' oy ti yhuimni ma anajty yjaccopicyity.

¹¹ Jada tung je Huindzin Dios ti tuñ, e ooy oy n'íjxim njäygidaacim.

¹² E huin'it je judíojäy ajcxy ytungmiidpi ooy jamadzaañ anajty Jesús, com ñejhuuyb anajty ajcxy co Jesús ñigapxyii yi' ajcxy. Com tzigiiyb anajty ajcxy miid je mayjäy, chi ajcxy tim huinyöyducy, chi ñíxcixni.

Yajnidiiygixy pen jëbi cogüéjtín yajyecy o pen ca'

¹³ Jac'axam je judíojäy ajcxy ytungmiidpi quejxy ajcxy ma Jesús yajpaady mejtzpicy ixpicytijc. Tügpiicy anajty ñaygomájtzigixy miid yi fariseos ajcxy, etz jadügpiicy ma je rey Herodes. Hue' anajty ajcxy huinma'ñ ixtaayb nej ajcxy ocxihuipy Jesús.

14 Jada mejtzpicypi ixpicytjic ñicxy ajcxy ma Jesús, e ymínañ ajcxy:

—Huindzin, ñich ajcxy nejhuñyb co myaj'ixpijcy je tıy'ajt, ca' jäy mdzigıy, com ca' huin'ixpety myaj'ixpıcy. Tú'cıy miich mduñ mıid mic jäy, mıid comeñyjäy, etz mıid ayoob jäy. Tudägy jäy ajcxy myaj'ixpıcy jadu'n nej huaad ajcxy cuychinaaygıxy Dios ytıy'ajt. Nejhuñhuaamybıch ajcxy nej miich yaj'ixpijcpy je mayjäy. ¿Nej tundıgooyım mıid yı Dios ycötújcın co nmıgüéjtim César, je romano jäy mıj'ane'mbi, o ca'ji? ¿Nej jëb nmıgüéjtim, o ca'ji?

15 Per Jesús ñejhuñyb anajty ajcxy yjıbıch-huinma'ñ, e chi ajcxy nımay:

—¿Na'amy co miich ajcxy xyjot'ixy xyhuinma'ñ'ıxyıch? Yajmiingıx tüg meen jıgıx n'oc'ıxıpyıch.

16 Chi ajcxy mımııñ tüg meen e co Jesús ijxy je meen, chi ymínañ:

—¿Pın y'ahuanax etz pın yxıı ijtp ma jada meen?
Chi ajcxy y'adzooy:

—Hue' yı' César.

17 Chi Jesús ymínañ:

—Mo' je César huıdıbı yı' yjë'ajtpy, e mo' Dios huıdıbı Dios yjë'ajtpy.

Chi ajcxy ooy jıhuıy huınmay jadu'n nej anajty Jesús tı y'adzooy.

Yajnidıygyıxy pen je tııbı öccıxy jugypıgıpy jadüg'oc

18 Je huın'ıt tiempo nijëjıty saduceos ajcxy ymııñ ma Jesús. Yı saduceos ajcxy ymınaangıxy co ca' pın yjugypıga'ñ tııbı y'o'ccıxy. 19 Chi je saduceos ajcxy Jesús nımay:

—Huindzin, Moisés jayhui'my je cõtújcın co tüg yëydijc y'ögy, e co'ögy yhui'my je ytöxyijc e ca'ni ytöxyijc ung'ixy. Pues copicy je co'ögy ytöxyjäy ypiğıpy miiđ ña'y y'uch yëydijcpi jigix jëbi je töxyjäy y'ung'ixipy huıdibi hui'mihuiıp jadu'n nej codijc cobıdägy ma je yteedy y'ajch ypidägy. ²⁰ Pues jim ma tüg cajp anajty chinäy huıxtujc yëydijc tüg que'x. Je ungoob ypijcy, e chi ix'o'cy ytöxyijc, e ca'ni tüg y'ung yajhui'my. ²¹ Je mimetzpi yëydijc ypijcy miiđ je co'ögytöxyjäy, e nañ jadu'n ix'o'cy ytöxyijc e ca'ni tüg ung yajhui'my. E nañ jadu'n je midugııgpi miiđ ypijcy je töxyjäy, e nañ jadu'n ix'o'cy je ytöxyijc, e ca'ni tüg y'ung yajhui'my. ²² E jadu'n oytuñyii yjadyii miiđ je töxyjäy co ti anajty miiđdzınay'abıdzımdäy je nihuıxtujcpi yëydijc tüg que'xpi. E je nihuıxtujcpi ix'o'cy ajcxy je töxyjäy, e ca'ni tüg y'ung ajcxy yajhui'my. E chi je töxyjäy oy y'öcni. ²³ E co anajty xii tiempo paaty, co anajty Dios yajjugypicy yi tiıbi ajcxy y'ögy, ¿huıdibi jada' ajcxy nidücti je yëydijc töxyijc'adaanıp je töxyjäy? Com ti ajcxy jadu'n nihuıxtujcpi miiđ tzinay'abıdzımgıxy.

²⁴ Chi Jesús je saduceos ajcxy nimay:

—Miıch ajcxy ca' mhuinjihuııy je tiy'ajt, com ca' mhuinjihuııygıxy Dios y'ayuc ytiy'ajt, e com ni ca' mnejhuııygıxy je mic'ajt huıdibi Dios ymiiđ. ²⁵ Pues co anajty yjugypııccıxy je jäy tiıbi y'ó'ccıxy, chi ca' ajcxy ypiğa'ñ, e nañ jadu'n ni ca' ajcxy ñaymöhuiıyb y'ung huen piıccıxy. Hue' ajcxy yjugy'adaangıxy chinähuaangıxy jiıby tzajpjoty, tim jadu'n nej je ángel ajcxy chinaaygıxy yjugy'ajtcıxy. ²⁶ Per je tiy'ajt co jäy ajcxy tiıbi

y'o'ccixy yjugypigaangixy, ¿nej ca'ni mgapxyñi Moisés ytiy'ajt ma anajty Dios ymìgapxyii co je aay ujtz anajty chachtoy? Chi ymìnañ: “Íich je' je Dios huìdib Abraham, Isaac etz Jacob yDios'ajtpy.”
²⁷ Com yì Dios ca' yì yDios'aty ma yì öcpi ajcxy huìdibi y'alma ti ycìxy ti ytigoy. Yì Dios Dios'ajtp yì' ma yì juugypì ajcxy. Paady miich ajcxy ooy mij mdundìgooygìxy co ca' mhuinjìhuìyigìxy Dios ytiy'ajt.

Je ané'mìn huìdibi ooy nìgì ycopìcyity

²⁸ Nañ jadu'n je huin'it tiempo nimiiñ Jesús tüg escriba. E yì' anajty y'amìdo'ijtpy co Jesús adzooy je jäy huìdibi ca' mibìcy co yì öcpi yjugypìgìpy ajcxy jadüg'oc. Jada escriba ñejhuìyb co Jesús ooy oy ti y'adzooy je saduceos ajcxy, paady yì' Jesús amìdooyì:

—¿Huìdibi je' Dios y'ané'mìn jacmìjpi?

²⁹ Chi Jesús y'adzooy:

—Yì Dios ycötújcin huìdibi jaccopìcyip, yì' je' huìdibi mìnamb: “Mìdoogìx Israel jäy, je Huìndzìn Dios huìdibi nDios'ájtìm, yì' je' ajt nHuìndzìn Dios tügpajcpi. ³⁰ Tzoc jìhui' etz yajmìj'at mHuìndzìn Dios mìid tüg'ócìy m'aa mjot etz mìid tüg'ócìy m'alma, etz mìid tüg'ócìy mhuinma'ñ, etz mìid tüg'ócìy mmic'ajt.” Jada je' je jaccopìcyip ané'mìn.

³¹ Je mìmètzpi Dios ycötújcin jahueengì tú'cìy ñaybadyii mìid je jayìjpi, yì' huìdibi jadu'n mìnamb: “Tzojccìx jìhuìygìx yì mmìgügtìjc tìm jadu'n nej mnaychogyii mnayjìhuìyì cì'm.” Jada metz Dios ycötújcin jaccopìcy jacmìc'ajt mìid ca'ydi jac huìdibi cötújcin.

³² Chi je escriba ymìnañ:

—Ooy oy ti m'adzooy. Janch tıy'ajt jadu'n nej miich mına'ñ, co ji yajpaady tıgpaajcpi Dios, e ca' ji jadüg Dios mic'ajt mıidpi. ³³ E janch tıy'ajt co copıcy nmıjıpıdaacım nyajmıj'ájtım Dios cıxyjot huınıjot mıid tıg'óciy ajt nhuınma'ñ, mıid tıg'óciy ajt n'alma, etz mıid tıg'óciy ajt nmıc'ajt. E copıcy ndzójcım njıhuııyım nmıgügtıjcım tim jadu'n nej naychójcım nayjıhuııyım cı'm. Jactzoobatp jada ca'ydı co tıg'óciy yı huındzıgı'ñ huıdıbı anajty yajno'cpi mıid Dios ycıxpi.

³⁴ Co Jesús ijxy jadu'n nej je escriba tıydudägy anajty ti y'adzoyıı, chi ymınañ:

—Jahuenjaty miich mmıbıjıcn ytıgoy'ıtyñı jaydëb mdıgıhuıpy ma Dios y'ane'my.

Co Jesús anajty jadu'n ti y'adzooy je escriba, chi ca' jac pın ti ayuc yjacyaj'amıdoohı.

¿Pın je' y'ung je Cristo?

³⁵ Jesús yaj'ıxpıjcpy anajty je mayjäy jııby ma Dios ytıjc, e ymınañ:

—¿Na'amy co yı escribas ajcxy ymınaangıxy co Cristo hue' je' David y'ap y'oc? ³⁶ Com je Espıritu Santo ymoy David jada ayuc huıdıbı jaybety ma je Salmo necy ma jadu'n ymınañ:

Yı Huındzın Dios nımay ıch nHuındzın: “İña' ya a'oy'amy ma ıch nmıjc, ıxtı coonı anajty miich mmıdzıp ti nmımadactäyıch, jadu'n nıpaadıpy nej jıhuıy ti nbıdägyıch miich mmıdzıp jadu'n nej tıg tınaybejt.”

³⁷ ¿Per nej co yjadu'nıty co jäy ajcxy ymınaangıxy co je Cristo David je' y'ap y'oc? ¿E David cı'm ymınañ co je Cristo yı' yHuındzın'ajtpy?

Jotcuıjc anajty je mayjäy amıdoo'ıjtı Jesús y'ayuc.

Jesús ca'p jäygidaci leyhuindzin ajcxy yhuinmañ

³⁸ Jesús yaj'ixpijcpy anajty je mayjäy, e yminañ:

—Naycuend'ájtigix miid yi escribas ajcxy. Com yi escribas ajcxy ooy jotcuyc co nayxójxigixy miid yhuít oyjatypi yoñjatypi. Ooy ajcxy tzocy co yaj-capxpócxixipy huindzigi'ñ'amy mayjäyduum. ³⁹ Yi escribas ooy ajcxy tzójccixy yi cödumbi iñaybejt ma je naymujctac, etz ooy ajcxy tzójccixy iñaybejt ma yi cömaybi jäy iñay ma jäy ajcxy yx#duñ. ⁴⁰ Yi escribas ajcxy yajcijxtaayipy yi co'ögy ytöxyjäy ypidägy miid ajcxy y'adzójcin. Yi' ajcxy ooy túngixy jecy tzajp-capxycapxi jigix ajcxy capxpaady idipy. Dios nigí tzaachytunipy yi escribas ajcxy miid ypocy ycixpi, ca'ydi jac ni pin.

Je ayoobi töxyjäy y'ofrendi

⁴¹ Tüg xii anajty Jesús iñay jilby tigoty ma Dios ytijc. Iñaayb anajty ma je limosna caja huinduu. Jesús yhuindicxyp anajty je jäy ajcxy huídibi meeñ pidaaccixp ma je ofrenda caja. E maycomeeñyjäy ooy ymeeñ pidaaccixy janch may. ⁴² Tim huin'ítiy yja'ty tüg co'ögy töxyjäy janch ayoob pidacy metz pi'c meeñyhuäcxy, huídibi ca' ooy choobaady. ⁴³ Chi Jesús huoomujcy je' ydiscípulos, e nimay ajcxy:

—Janch tiy'ajt jadu'n nimaaygixy co jada co'ögy ytöxyjäy ayoob jac'anaxy jada ti pidägy ofrenda, ca'ydi jac ni pin. ⁴⁴ Tüg'óciy comeeñydijc ajcxy ypidacpy ma y'ofrenda yi meeñ huídibi yajconaxyp. Jadayaabi co'ögytöxyjäy ti pidacy tüg'óciy huídibi anajty ymiid, je meeñ tüg'óciy huídibi anajty ñigayamy yi' ymooyb Dios.

Jesús yminañ co Dios ytijc yhuindigoopy

13

¹ Co Jesús ypidzimy ma Dios ytiyc, chi nidügti ydiscípulos ñimayi:

—Huindzin, ix jada maychaa mijjatypi etz jada maybi tiyc ooy y'oy'oydúñity.

² Per Jesús y'adzooy, ymínañ:

—Huindicx miich ajcxy jada maybi mijjaty ytiyc. Minip tiempo mina tüg'óciy jada tiyc nicxy yhui'my taj xit, ca' ma tzaa macxy. Huindigoydähuiip tüg'óciy.

Je tiy'ajt ma ca'ni naaxhuiñybi ycíxa'ñi ytigoya'ñi

³ Jesús mïd ydiscípulos ajcxy ñicxy ma je cop huídibi xijip Olivos. Jim ajcxy co'ijxnaxy je Dios ytiyc. Hñayb anajty Jesús jim copcíxy co Pedro, Jacob, Juan etz Andrés ameech migapxy Jesús, ymínaangíxy:

⁴—Tun may'ajt ich ajcxy yajnimaaayg mina jada ytuna'ñyii yjada'ñyii co huindigoydähuiip Jerusalén cajp. ¿Ti iixpejt'adam co anajty jadayaabi jadu'n ytuna'ñyii yjada'ñyii?

⁵ Chi Jesús y'adzooy ajcxy je' ydiscípulos ymínañ:

—Ix pinjaty xyhuin'ñngíxy. ⁶ Ooy jäy may ymínañ mïd ich nxii. Ñaydíjánigíxy co je' ajcxy je' je Cristo, ymína'na'ñ ajcxy: “Ich je' je Cristo.” E ooy jäy may huin'ñnaangíxy.

⁷ Co miich ajcxy ayuc mmïdohuiipy co jäy chachchiptúngíxy xii ya, ca' mdzigíyigíxip, com ooy ycopícyity co jada jadu'n jayijp ytuníyib yjadíyib. Ca' nan hue' je' anajty tim cíxp tim tigooyb je xii je tiempo. ⁸ Nayñibidígíib tüg naax cajp mïd huíngbi naax cajp, e gobierno mïd huíngbi gobierno. E minipy mic uyx canaag'it etz mij yuu mijpa'm

xii ya. E jäy ajcxy ooy yhuänipy yjihuihuipy ycanaymijotcuyc'ájtigixipy. Jada tzaachypi ayo'n tzondacni yi' anajty.

⁹ Chi Jesús yjacmínañ:

—Nayguend'ájtigix miich ajcxy, com yi mmídzíp ajcxy xymájtzcixíp, e xyciyéjccixíp ma tungmídpídjic, e xychachytúngixíp xyhuójpcixíp ma yi judíojäy ñaymujctac ajcxy. Xyajníxcixíp mach ma rey etz ma gobernador ajcxy yhuinduu míid íich ycixpi com miich ajcxy xymíbicyich. E miich ajcxy tíy'ajt myegípy míid íich ycixpi, íxti ma rey ajcxy etz ma gobernador ajcxy yhuinduu. ¹⁰ Ca' anajty xii tiempo paady mína ycíxa'ñ naaxhuiñybi, chi ajcxy capxhuácxtáhuipy íich n'ayuc huindu'myb ñaaxhuiñ ma tüg'ócíy naax cajp. ¹¹ Co jäy ajcxy xyajnícxíp mach ma codungdjic co xytíydúngixípy, chi ca' ni nej mjot'adíyb, ni ca' mhuinmayípy nej m'adzóogixípy. Mgápíxcixípy je ayuc huídíbi Dios xymóoygixípy, com je ayuc huídíbi mgápíxcixíp, ca' nan miich je' anajty ajcxy m'ayuc. Hue' je' je Espíritu Santo xymóoygixípy capxy ayuc. ¹² Yéydíjic ajcxy ycíyegamyb ma tungmídpí ycí'm y'uch ajcxy co huen yaj'ögyii. E nañ jadu'n je ungedeedy ycíyegamy ycí'm y'ung ajcxy ma tungmídpí. Nañ jadu'n yi' y'ung ajcxy cíyegípy ycí'mdeedy co huen yaj'ögyii. ¹³ May naaxhuiñjäy ca' xychogípy xyjihuihuipy miich ajcxy míid íich ycixpi. Pen miich ajcxy mmíctínaayb ma mmíbíjicín, ypaadíp miich ajcxy m'alma nídzoocín.

¹⁴ Chi Jesús yjacmínañ:

—Co anajty m'íjxcixy je huídibi Daniel ñimíydac jecy'ajty, co pínjaty jíbic-huinma'ñ tumb ma ca' ypadyii ma Dios ytíjc, huídibi ooy ycodzigíity. Mi-ich ajcxy huídibi tzínaayb jim Judea, co jadu'n m'íjxcixípy, chi nicx mgueectzooccix ma tungop. ¹⁵ Yí jáy ajcxy huídibi yajpatp ma ytíjcnícx ca' ñícxity tígoty ma ytíjc. E ni ti jiiby cayajpidzimípy. ¹⁶ Yí jáy ajcxy huídibi yajpatp camjoty, ca' ajcxy ni-huimbíípy je' yjocxy huit huídibi ymíid. ¹⁷ Huin'it xíi huin'it tiempo ayo'n pada'ñ je töxyjäy huídibi anajty ti y'ungtzímígy, e nañ jadu'n yí' ajcxy huídib míid y'ung ma'xung yajtzítzp. ¹⁸ May'ajt ajcxy mbíjctzoohuípy ma Dios, co jada jadu'mbi ayo'n ca' ytuníyb yjadíyb ma anajty ytíich tíempity. ¹⁹ Yí jadu'mbi xíi tiempo jáy ajcxy ayo'n tzaachypí minaxípy yajnaxípy. Ni camínaaxíi jáy jadu'n tzaachypí mijcajee ti minaxy ti yajnaxy maabi Dios cojy naaxhuiñybi oga'n, íxti chambaad. E camínaaxíi jadüg'oc ycajadíyb jadu'n. ²⁰ Pen ca' Dios capx'aduga'ñ yíjiiíbi ayo'n xíi ayo'n tiempo, ca' ni pín chögípy. Per Dios ycapx'adugamyb yíjiiíbi ayo'n tiempo míid je míbíjcpííjic ycíxpi huídibi Dios ti huin'ixy.

²¹ Co yí jadu'mbi xíi tiempo anajty ymíiñ, ca' mmíbígípy, pen ji pínjaty xyñímaaygíxy: “Íjxcix, cha yajpaady je Cristo”, o “jim'amy yajpaady je Cristo.” Ca' mmíbíjccixípy jáy y'ayuc. ²² Miníp jáy ajcxy huídibi ñayyajnaxáanígíxy nej Cristo, e ymínáangíxípy co capxhuácxí ajcxy Dios y'ayuc, e ca' yjánchity. Ytunípy ajcxy mij huinma'ñ etz míjpi íjxpejt, íxti jahuin'íina'ñ je mayjäy ajcxy huídibi Dios ti yhuin'ixy. ²³ Nayquend'ájtígíx míid yí

jadu'mbi jäy ajcxy, com jayijp ñch miich ajcxy yi' ti nyajmñdmıydağy.

Nejjada' je Dios y'ung yminiipy jadüg'oc

²⁴ Chi Jesús yjacmınañ:

—Co anajty yi jadu'mbi ayo'n tiempo ti ñaxy, ycoodzihua'ñ etz je po' ca' y'ana'ñ. ²⁵ Maymadza' ycähuip, e nañ yücxiip huidijaty mic'ajt miid tzajpjoty. ²⁶ Je huin'it xii je huin'it tiempo co jadu'n anajty ytunyii yjadyii, huin'it ajcxy m'ixıpy, ñch je jäy huıdibi tsoon tzajpjoty, co ñch anajty nmıiñich jocjoty miid tüg'óciy nmic'ajt n'oy'ajtich. ²⁷ Co jadu'n anajty nmıiñich, chi mic'amy nguexıpyich ñch n'ángeles ajcxy ma xii ypidzımy, ma xii ycidägy, ma jımboj ypidzımy etz ma tichpoj ypidzımy. N'ángeles ajcxy yajmuga'ñ tüg'óciy ñch njäy, huıdibi ti nhuin'ixyich, xım yam ma ajcxy yajpaady ya naaxhuiñ, etz jiıby tzajpjoty.

²⁸ Chi Jesús yjacmınañ:

—Jëb miich ajcxy tıy'ajt mbiğıpy ma yi hıgueri jadu'n nej je xii je tiempo mimb cıdaacni. Co je hıgueri jadüg'oc ñıhuamıy, chi miich ajcxy mnejhuıy co ti yhuıgoni mına ypottıgııyñi. ²⁹ Nañ tim jadu'n co m'ixıpy tunıyb yjadıyb tüg'óciy ijxpejt nej ti nnımaaygıxy, chi mnejhuıhuip co ti yhuıgoni je tiempo mına nhuımbıdıpyich jadüg'oc ya naaxhuiñybi. ³⁰ Janch ñch miich ajcxy nmıäy co jada huıdibi ti nnımydacyıch tunııb jadııb ca'ni anajty y'öctay je jäy ajcxy huıdibi jacjogy'ajtp jadachambi xii jadachambi tiempo. ³¹ Je tzajp etz je naaxhuiñybi cıxıpy tıgoyıpy. ñch n'ayuc huıdibi ngapxyıch, ca' ycıxıpy ytıgoyıpy ni camınaxii. ³² Ca' ni pın nejhuıy je xii je tiempo

mına ytuna'ñyii yjada'ñyii jadu'n nej ti ñich miich ajcxy nnimaaygixy. Ni je ángeles ajcxy jiiby tzajpjoty ca' nejhuñygixy, nañ ni ñich, Dios y'ung', ca' nejhuñyich. Jëyi Dios Teedy tügpajc nejhuñy.

³³ Ni'ixi' ahuíxcix. Mibijctzoogix Dios jabom jabom, com ca' mnejhuñygixy mına anajty ytuna'ñyii yjada'ñyii yi huídibi ti nyajnimaaaygixy.

³⁴ Yi xii yi tiempo huídibi minip jadu'n nipaady nej tüg comeñyjäy huídibi ñicxa'ñ ma tüg it lugar huídibi jigüegy yajpatp. Jayijp ca'ni anajty chooñ, chi yajnibijcy je ytumbi ajcxy nidüg nidüg je' ytung. E nimay je' ytumbi huídibi cuend'ajtp je tijc'aguu co huen ni'ixi' y'idipy ma tijc'aguu.

³⁵ Ni'ixi' m'idipy miich ajcxy. Com ca' mnejhuñygixy mına je codijc yhuimbida'ñ ma ytijc, pen namgodziy, o mij coodz, o moñi, o ma anajty ti yximiiyñi.

³⁶ Ca' jécyity co yjadipy timetiini, e xyajyöybéjtcixipy anajty mdzachmaagixy. ³⁷ Yi huídibi ñich miich ajcxy ti nyajnimaaaygixy, nañ jadu'n nimäyich tüg'óciy jäy co huen ajcxy nidüg'óciy ahuíxcixip ni'ixi' je xii je tiempo mına nhuimbidiyich jadüg'oc ya naaxhuiñ.

14

Xicmujccixy capxmujccixy co Jesús madzaangixy

¹ Tigoy'ijtni anajty mejtz xii co judíojäy ajcxy nixiiduna'ñ je pascua xii, mına ajcxy tzajcaagy cay huídibi ca' levadura miiidity. Je judío teedy ajcxy huídibi jacmijtungmiiid etz je escribas ajcxy huinma'ñ'ixtaaygixy nej jëb ameech májtcixipy

Jesús, e yaj'ögaangixy, ca'ydi je mayjäy nejhüy.
² Chi ajcxy ñayñimayi miñ xyipy:

—Ca' y'óyity co nmájtzim Jesús xijoty. Com ca' yjécyity co je mayjäy yjotmátcottáhuipy, e ytigíhuip huambi jihuuyb ajcxy.

Tüg töxyjäy pidacy aceite ma Jesús ycohuajc

³ E Jesús jim anajty yajpaady jim Betania. Hue' Jesús anajty yajpaady ma Simón ytijc, je Simón huídibi anajty ymíid nübüd pa'm. Jesús iñaayb anajty ma caydac co ymiiñ tüg töxyjäy míid tüg tzaadüdz quiig ujtz míid perfume huídibi ooy oy yxuugy. Jada perfume ooy anajty chóohuity. Chi je töxyjäy yaj'ahuäch je quiig, e yajcöyogiy Jesús je perfume huídibi ooy oy yxuugy. ⁴ E nijéjity jäy ajcxy huídibi anajty jim, ca' anajty ajcxy yjotcújcity míid huídibi je töxyjäy ti tuñ, e ñayñimayi ajcxy miñ xyipy:

—¿Nej jada co ocyaj'ayooni yi perfume huídibi ooy oy yxuugy? ⁵ Jac'oy co ixypy yajtoogy yi perfume tugiig migo'px peexy, jigix yajpubedipy ayoobtijc.

E ca' jadu'n ajcxy tim jäygidacy nej je töxyjäy ytuuñ míid Jesús, chi ix'ojy ajcxy je töxyjäy ayooob.

⁶ Chi Jesús yminañ:

—Ixmajtzci x jada töxyjäy. ¿Nej co m'amayiygixy? Yi huídibi ti tuñ míid íich, ooy yi' y'óyity. ⁷ Je ayoobtijc ca' ytigoy'idipy ma miich ajcxy nimina. Huen huídibi xii huen huídibi tiempo jéb mbubedip ajcxy ayoobtijc. Per íich ca' n'ida'ñich ya jecy míid miich ajcxy. ⁸ Jada töxyjäy ti tuñ míid íich jadu'n nej ti ymadägy. Yi' ti pidägy ma íich nninícx perfume huídibi ooy oy yxuugy.

Yi' jipp'ijxpy mina naaxtigihua'ñich. ⁹ Janch ñich miich ajcxy nimaaygixy co huen yma'ámyity ya naaxhuiñ ma anajty yaj'ñhuäcxy yajcapxhuäcxy jada ayuc jada tiy'ajt huidibi ñidzoocin mñid, yajnimiydägipy huidi jada töxyjäy ti tuñ, jigix capxpaady y'idipy.

Judas cïyecy yi Jesús ma ymidzip

¹⁰ Huin'it tiempo je Judas Iscariote, nidüg je nimajmetzpi huidibi Jesús anajty ti huin'ixy, oy mñid ñaygapxyii je teedy mïjtungmñidpi nej jëb cïyeycy Jesús ma yi teedy ajcxy. ¹¹ Co je teedy mïjtungmñidpi ajcxy jadu'n midoy, co je Judas cïyega'ñ Jesús ma yi' ajcxy, chi ajcxy ooy yjotcugñy. Chi ajcxy Judas meeñ yajhuinhuanñy. Chi Judas yhuinma'ñ'ixtay nej jëb occïyecy Jesús ma yi' ajcxy.

Co Jesús y'adzu'ajty pascua xñjoty

¹² Chi paty je mij xñ mina je xñ'ajtpidijc tzajcaagy cay huidibi ca'p levadura mñidity, e yaj'öccixy je cöbixy huidibi ajcxy yajhuindzigñyib anajty Dios. Chi ydiscípulos ajcxy y'amidooy Jesús:

—¿Ma'amy mdzocy co ni'ixiñyim je pascua xñ adzu'ajtín?

¹³ Chi Jesús quejxy metz ydiscípulos ajcxy capjoty, chi nimay:

—Jim mñid mnaybadñyib tüg yëydijc huidibi nñ tzimñicxp ma tüg majt. Miich ajcxy mbanicxñyib je yëydijc. ¹⁴ Mbanicxipy ajcxy je yëydijc, ixti coon mbajädipy ma ytijc. E miich ajcxy mnimähuiipy je codijc: “Je Huindzin Jesús ñejhuihuam ma miich mñidity tüg cuarto ma je Huindzin Jesús mñid ydiscípulos ajcxy jëb caaygixy yi pascua xñ

adzu'ájtín.” ¹⁵ Je codijc ci'm xyajni'ixiigyixyip tüg cuarto mijpi ma je mîmetz piso huídibi ti yajni'ixiy. Ma yijimbi cuarto miich ajcxy mni'ixihuipy yi pas-cua xi adzu'ájtín.

¹⁶ Chi je metz Jesús ydiscípulos ajcxy tÿyöychooñ. Co ajcxy yja'ty cajpjoty, chi ajcxy paty je cuarto, tim jadu'n nej Jesús jayijp ymînañ. E jim ajcxy ni'ixiy je pascua xi adzu'íbi.

¹⁷ Nam coodziyñi anajty co Jesús yja'ty ma je cuarto mîd jacjadyii ydiscípulos ajcxy. ¹⁸ Co anajty jim ycaaygixy ma je caydac, chi Jesús ymînañ:

—Janch ñch miich ajcxy nimay co nidüg miich ajcxy huídibi cham caayb mîd ñch, xyciyegaambich ma nmîdziþich.

¹⁹ Co je Jesús ydiscípulos jadu'n mîdooy, chi ooy ytigiy tajpi maybi ajcxy, e ñay'amîdóohuigixy miñ xyipy, e tÿg ymînañ:

—¿Nej ñch jada'ji?

E jadÿg ymînañ:

—¿Nej ñch jada'ji?

²⁰ Chi Jesús ymînañ:

—Yi' yi' nidÿgti yi nimajmetzp huídibi tocxmujcp mîd ñch ma tÿgpi texy. ²¹ Pues janch ñch je', je jÿy huídibi tzoön tzajpjoty, nbadaamybich tzaachypi ayo'n jadu'n nej yjaybétyity ma yi Dios ñecy. Per mij ayo'n pada'ñ je jÿy huídibi xyciyegaamich ma ñch nmîdziþ. Jac'oy co ca' ycadimma'xung'ajty jada yÿdyjc.

²² Caayb ajcxy anajty, co Jesús conigy tÿg tzaj-caagy, e jayijp yajnajx Dioscojuyip ma Dios, e chi tujc-huäcxy je tzajcaagy, moy je' ydiscípulos ajcxy. E co Jesús jadu'n tuñ, chi ymînañ:

—Caaygix jada tzajcaagy. Jada tzajcaagy ñich jada nninix.

²³ Chi Jesús conígy je ügy vaso, e co Dioscojuyip yajnaxy, chi moyday ajcxy je ügy, e nidüg'óciy ajcxy uucy je ügy. ²⁴ Chi Jesús ymíñañ:

—Jada ügy ñich nni'py'ajtpy huídibi temamb yogamb. Je' jada jemybi Dios ycötújcín huídibi Dios yejc mñid jäy ajcxy ycixpi. ²⁵ Janch tñy'ajt jadu'n nej ñich miich ajcxy nimaaygixy, co ca' jadüg'oc n'üga'ñich vino nñi, ixti cooni anajty njädyich tza-jpjoty ma yi Dios y'ane'my.

Jesús capxpídzimy co Pedro ymíña'nañ co ca' y'ixy'adyii

²⁶ E co Jesús etz ydiscípulos ajcxy ñy tüg himno, chi ñicxy ajcxy ma je cop huídibi xñijp Olivos.

²⁷ Chi Jesús ymíñañ:

—Cham coodz xycöguëgaambich miich ajcxy, com jaybety jadu'n ma Dios ñecy ma jadu'n ymíñañ: “Nyaj'ögaamybich je cöbixy cuend'ajtpi, e huin'it je cöbixy queeg-huäcxtähuip.” ²⁸ Per co ñich anajty njugypícyich jadüg'oc, co ñich anajty ti n'ögyich, nícxibich jim Galilea jacjayijp, ca'ydi miich ajcxy.

²⁹ Chi Pedro Jesús nimaayi:

—Oy ixypy yi jacjadyii miich mdiscípulos ajcxy xycöguectäy, per ñich ca' miich ngöguëga'ñ.

³⁰ Per Jesús nimay Pedro:

—Janch tñy'ajt jadu'n nej yam nímäy, jadachambi coodz ma ca'ni anajty tzeyyaxigy mejtz'oc miich xycoyüdz'a'ñich tugig'oc, míña'nañ co miich ca' xy'ixy'adyiijich.

³¹ E Pedro ca' anajty cöbigañ nej Jesús ymíñañ, chi mictägy mínañ:

—Ca' ñich miich ngoyüdzañ, oy ixypy ndim'o'cich quipxy mïd miich.

E ñañ actim jadu'n jacjadyi Jesús ydiscípulos ajcxy ymínañ nej Pedro ti ymínañ.

Jesús mibijctzoy Dios jim Getsemaní

³² Jesús mïd ydiscípulos ajcxy oyja'ty ma tüg it huídibi xíjip Getsemaní, chi Jesús je ydiscípulos ajcxy nimay:

—Íña' miich ajcxy ya, nami n'ocnicxyich jim'amy Dios mibijctzoob.

³³ Chi Jesús mïd nicxy jëda'ajty Pedro, Jacobo etz Juan ma tüg it ahuingujc. Chi Jesús ytigíy tajpi maybi jihuíy jotmay. ³⁴ Chi Jesús ymínañ:

—Njihuybich tüg jotmay nej n'ögañich. Huímgix miich ajcxy ya etz juugy m'íjtcixipy, ca' mmáagixipy.

³⁵ Chi Jesús ñicxy jac'amijci'm, Dios mibijctzoy, e may'ajt pijctzoy co ixypy ca' minaxy yajnaxy je tzaachypi huídi anajty ypadamy je huin'it hora.

³⁶ E Jesús anajty Dios mibijctzoy ymínañ:

—Dios, mïd miich ca' ni ti chípity. Píjicigich jadaabí tzaachypi ayo'n, per ca' yjadú'nity nej ñich ndzójcin, huen tuñyí jadu'n nej miich mdzójcin.

³⁷ Co Jesús nihuimbijty Pedro, Juan, etz Jacobo, chi oy ajcxy paady ti anajty ymí'ó'ccixy. Chi Jesús Pedro nimay:

—Simón, ¿nej ti mmi'ögy? ¿Nej ca' mmadägañ m'idipy juugy tüg hora? ³⁸ Jugy'íjtcix, e mibijctzoogix Dios ca'ydi jibictuuyb mdigíyigixy.

Janch t̄iy'ajt co jotjoty ooy mnijot'ájt̄c̄ixy mdunaanḡixy ȳi oybi. Per ȳi mnin̄ic̄x oy amaaȳity.

³⁹ Chi Jesús jadüg'oc huinhuäct̄uuty je' ydiscípulos ajcxy, e jadüg'oc ñ̄ic̄xy Dios m̄ib̄ijct̄oob. May'ajt pījct̄zoy tim jadu'n nej je jaȳijp'atyp̄i anajty ti ym̄ina'ñ. ⁴⁰ Chi Jesús yhuimbijty ma anajty ajcxy ydiscípulos yajpaady, e jadüg'oc oy pátc̄ixy ti anajty ym̄i'öcc̄ixy, com ca' ajcxy m̄imadägy m̄ähūi, e ni ca' ajcxy jajty nej adzohuipy Jesús. ⁴¹ Miduḡüg'oc Jesús ñ̄ic̄xy ma je' ydiscípulos ajcxy, e ym̄ina'ñ:

—¿Nej ya m̄jacm̄aḡixp m̄jacpooxc̄ixp? Maaḡix pooxc̄ix jadachambi. Ti m̄īd jadu'ñ̄ȳi. Ti je tiempo huaad'ájt̄ni m̄ina ñ̄ch, je jāy hūidibi t̄zoon tzajpjoty, xyc̄iyeḡipy ajcxy ma ȳi j̄ib̄ic jāȳdj̄c. ⁴² Mayb̄id̄iḡc̄ix, tzoc jām̄im. Chi ym̄iñ je jāy hūidibi xyc̄iyegaamb̄ich ma nm̄idz̄ip̄ich.

Mach ajcxy Jesús yajñ̄ic̄ixy

⁴³ Capxp anajty Jesús, co Judas oyjäty ma Jesús yajpaady. Judas hue' je' nidüḡti je majmetzpi hūidibi Jesús yhuin'ijx. Judas m̄īd m̄iñ mayjāy hūidibi ajcxy m̄īd pujx etz quipy. Je teedy m̄j̄tungm̄īdp̄i, je escribas ajcxy, etz je m̄ijj̄ȳdj̄c ajcxy ti anajty quexy je mayjāy hūidibi anajty madzamb Jesús. ⁴⁴ Judas, je hūidibi anajty c̄iyegamb Jesús, hue' anajty jaȳijp ti moy je mayjāy t̄üḡ ijxpejt hūidibi m̄īd j̄eb̄ ajcxy ijxcabip Jesús. Jadu'n jaȳijp Judas ycapxytuñ m̄īd ȳi' ajcxy, e ym̄ina'ñ:

—Je jāy hūidibi anajty ndz̄üc̄yp̄ich, ȳi' je' anajty Jesús. Madz̄ipy ajcxy, e myajñ̄ic̄ixp miich ajcxy yajxon cuend'aty.

⁴⁵ Mic'amy co Judas oyjädy ma Jesús yajpaady, chi nimijhua'cy, e nimay:

—Huindzin, Huindzin.

E co jadu'n ymınañ, chi Judas Jesús tzücxý. ⁴⁶ Chi mic'amy je mayjäy Jesús mach, e yajnicxy ajcxy mach.

⁴⁷ Per nidügti Jesús ydiscípulos juudy ypujxy ma ytijc, chi je teedy mïjtungmïidpi tüg ytumbi yajtzaachüyi, quejtzpujxi tüg ytätzac. ⁴⁸ Chi Jesús je mayjäy nimay:

—¿Ti co miich ajcxy xyñimiiñich mïd pujx etz quipy, jadu'n nej jihuiy ïich tüg meetzpi? ⁴⁹ Jabom jabom nyaj'ixpijcyich jäy jilby ma Dios ytijc ma miich ajcxy myajpaady, e ni ca' miich ajcxy xy-majchich. Paady jadu'n ytunyii yjadyii jigix yi' yajcuydumb nej ity jaybety ma Dios ñecy.

⁵⁰ Chi je' ydiscípulos ajcxy yajhui'my Jesús naydügpajc. Chi je' ajcxy yqueegy.

Je jäy mutz'anägnip huidibi quectzög

⁵¹ Per tüg yujcyeeg anäg huidibi anajty payöy Jesús nímóchity anajty mïd tüg sábana. Chi Jesús ymidzip ajcxy majch je yujcyeegpi. ⁵² Chi je yujcyeegpi cïqueegtuty je mayjäy, yajhui'my ysábana, e yquecytzögy nihuädz ixhuädz.

Jesús mij juntijoty

⁵³ Chi ajcxy yajnicxy Jesús mach ma je teedy mïjtungmïidpi yajpaady. Chi mic'amy ñaymujci tüg'óciy teedy ajcxy huidibi mïjtungmïidpi, e tüg'óciy mijjäydijc, etz tüg'óciy escribas ajcxy. ⁵⁴ Chi Pedro jigüegy anajty panicxy je mayjäy ajcxy ixti oy yja'ty ma je teedy mïjtungmïidpi

ytiba'. E jím ixtacy quipxy m̄id policía ajcxy agujc, yxaamgixy anajty ma j̄inba'.

55 Je teedy ajcxy m̄itungm̄idp̄i etz t̄üg'óc̄iy je judíoj̄äy ytungm̄idp̄i ajcxy yhuinma'n̄'ixtaaygixy nej ajcxy j̄ëb Jesús yajpocyca' m̄id ajcxy yx̄ihuín, e jadu'n j̄ëb mooygixy yi öc̄in. Per ca' ajcxy paady huinma'n̄. 56 Mayj̄äy n̄ihuambejty Jesús m̄id an̄i, e ca' ajcxy y'ayuc yt̄üḡiy. 57 Nij̄ëjty j̄äy yt̄inaȳigy juntajoty, e n̄ihuambety ajcxy Jesús, ym̄inaangixy:

58 —Ich ajcxy am̄ido'ijt Jesús y'ayuc t̄üg t̄ecy, co jadu'n ym̄inañ: “Njidaamyb̄ich jada Dios yt̄ijc huídib̄i j̄äy ti cójc̄ixy, e coduḡig x̄i gojt̄igadzip̄ich huingb̄i huídib̄i ca' j̄äy cojy.”

59 Per ni ca' yt̄üḡiy ajcxy y'ayuc nej ajcxy Jesús n̄ihuambejty, ac t̄igachjaty nid̄üg nid̄üg ym̄inañ ajcxy.

60 Chi je teedy huídib̄i je jacm̄itungm̄id yt̄inaȳigy juntajoty, chi y'am̄idooy Jesús e n̄imay:

—Jesús, ¿ca' nej m'adzohua'n̄iyi? ¿Ca' mm̄idooy nej xychachx̄igixy?

61 Per Jesús am̄oñ y'ijty. Ca' ti ayuc adzohuimb̄i-jty. Chi je teedy jad̄üg'oc m̄igapxy Jesús n̄imay:

—¿Nej miich je' je Cristo, je Dios y'ung?

62 Chi Jesús ym̄inañ:

—Janch jadu'n, ich je' je Cristo, je j̄äy huídib̄i tzoon tzajpjoty, e miich ajcxy xy'ix̄ip̄ich iñ̄äȳich ma je m̄ijp̄i Dios ym̄ijc a'oy'amy. Nañ jadu'n xy'ix̄ipȳich miich ajcxy jocjoty co anajty nhuimb̄itȳich jad̄üg'oc ya naaxhuiñ.

63 Chi je teedy huindzech huinhuocy yci'm yhuit, je' je' t̄iy'ájt̄ip co ca' anajty yjotc̄újc̄ity m̄id Jesús y'ayuc, chi ym̄inañ:

—¿Ti testigo njac-huaanim? ⁶⁴ Miich ajcxy ci'm ti mmidoogixy yi' y'ayuc, jadu'n nej ycapxtigoy miid Dios. ¿Nej miich ajcxy minaangixy?

Chi nidüg'óciy ajcxy ymínañ co janch jadu'n Jesús mij oy ti ycapxtigoy miid Dios ytiy'ajt, paady huaad mooygixy yi' o'cin.

⁶⁵ Chi nijéjity jáy yhuindzujígy Jesús. Chi ajcxy huingoxodziy, cójxcixy, e chi ajcxy nimay:

—Octiygapx. ¿Pín ti xycojxy?

E je policiatijc ajcxy cojxy Jesús ma yhuiñyjijp.

Pedro ycoyüch Jesús

⁶⁶ Pedro tibäy anajty y'ahuixy. Chi ñimijhuäci tüg tumbi töxyjäybi huídibi anajty tumb ma je teedy ytijc. ⁶⁷ Co je töxyjäy ijxpaty Pedro iñäy anajty jünba'áy, yxaamb anajty. Chi huindícxpejty Pedro, e nimay:

—Miich nañ miidhuidijtpy anajty je Jesús yi' Nazaretpi.

⁶⁸ Per Pedro ca' cöbijcy je töxyjäy y'ayuc, e ymínañ:

—Ca' n'ixy'adyiijich jada Jesús. Ni ca' nhuinjihuñyich ti miich nimíydacpy.

E mic'amy Pedro ypidzimy jüby, e tim huin'ítiy tüg tzeyñi'aa oy yaaxígy. ⁶⁹ Chi jadüg'oc je tumbi töxyjäybi huindícxpejty Pedro, e nimay je jáy ajcxy huídibi jim yajpatp huingon, e ymínañ:

—Jada je' nidügti huídi anajty miid huídity Jesús.

⁷⁰ Chi Pedro jadüg'oc ymínañ co ca' ix'adyii. Co hueeñi, je jáy ajcxy jadüg'oc Pedro nimay:

—Janch co miich je' nidügti ma Jesús yjäy miñ, Galileo jáy miich, com nmídooybich miich m'ayuc nej Galileo jáy ycapxcixy.

⁷¹ Co ajcxy jadu'n ymīnañ, chi Pedro mictägy ñaygogapxi co ca' yi' mīdhuidity Jesús, ymīnañ:

—Dios y'ijxpy ñejhuiyb co tiy'ajt ngapxyich, co ca' n'ixy'adyiijich yi' Jesús huīdibi miich ajcxy mni-gapxyp.

⁷² Co Pedro ycapxymaayi tim huin'itay tüg tzeyñi'aa yaaxigy mīmejtz'ocpi. Huin'it Pedro jäymetzcoody nej Jesús ñimäyii: “Cham coodz jayijp ca'ni anajty tzeyñi'aa yaaxigy metz'oc, ti anajty miich mīnañ tugig'oc co ca' xy'ix'adyiijich.” Co Pedro jadu'n jäymetzcoody Jesús y'ayuc, chi tajy may ñayjihuiyi, e ytiigy yaaxpi.

15

Jesús ma Pilato yhuinduu

¹ Co yximiy, chi je teedy ajcxy huīdibi mij tung mīd, je mijjäydic, je escribas ajcxy, etz tüg'óciy judíojäy huīdibi mij tung mīd yöymujctay ajcxy. Chi nidüg'óciy ajcxy yajnicxcixy Jesús cīxoch ma Pilato, je gobernador. ² Pilato Jesús y'amidooy, nimay:

—¿Nej miich rey'ajtp ma yi' judíojäy ajcxyi?

Chi Jesús ymīnañ:

—Miich jadu'n mīnamb.

³ Je judío teedy ajcxy huīdibi mijtungmīdipi mictägy tzachxigixy Jesús mīd canaagnax xīhuin.

⁴ Chi Pilato jadüg'oc Jesús y'amidooy, nimay:

—¿Ca' nej m'adzohua'ñi? Ix nej yi' mmīdzip ajcxy xychachxigixy.

⁵ Chi Jesús ca' ni nej y'adzooy. E Pilato ooy chachhuinmay'ahuīdijty.

Jesús yajmoy ysentencia co y'ögipy

6 Com xiijoty anajty, je gobernador Pilato najtzmadzihy tög machyjäy, je huídibi je mayjäy anajty ypijctzoogixyp. 7 Pujxtijc iñaayb anajty jim Jerusalén tög machyjäy huídibi anajty yxi Barrabás. Barrabás pujxtijc iñaayb anajty quipxy miid jacjadyii jäy huídibi anajty ti midziptzoon je gobierno romano, e ti anajty yjäyyaj'ó'ccixy. 8-9 Co anajty je may yxi'ajtpidijc may'ajt pijctzoogixy ma Pilato co najtzmadzihuiip tög machyjäy, chi Pilato yminañ:

—¿Nej mdzojccixyp co nnajtzmadzihuibich je judíojäy ajcxy yrey?

10 Pilato ñejhuíyb anajty co mañ'ajtingíxy anajty ajcxy je teedy miitungmiidpi ti ciyejccixy Jesús. 11 Per co Pilato jadu'n yminañ, chi je teedy ajcxy miitungmiidpi ooy ajcxy yajhuamgoty yajjihuiygoty je mayjäy co huen je Pilato najtzmadzihy je Barrabás. 12 Chi Pilato y'amidooy je mayjäy jadüg'oc:

—¿Nej miich ajcxy mdzocy ndunipyich miid jada yéydijc huídibi jäy ajcxy ytijpy co yrey'aty ma yi judíojäy ajcxy?

13 Chi je mayjäy mic yminangottay:

—Yajcruutzpet.

14 Chi Pilato yminañ:

—Per ¿ti yi' ti tundigoy?

Huin'it je mayjäy nigi mic yminañ:

—¡Yajcruutzpet!

15 Co jadu'n je mayjäy ajcxy mictägy yminanday, chi Pilato anajty yajjotcujc'adaangixy je mayjäy, chi najtzmadzihy je Barrabás. E co yajc'i'ajttay yi Jesús, chi ciyejcní co huen yajcruutzpedyii.

16 Chi je soldados ajcxy yajnicxy Jesús ma je aguctijc tiba', e jim ñaymujci tüg'óciy soldados ajcxy huídibi yajpatp anajty jim Jerusalén. 17 Chi ajcxy yajñijeny je Jesús tüg rey yhuit, color ucypí e yajcojeny ajcxy apy corona. 18 Chi je soldados ajcxy ymíñañ:

—¡Viva jada judío rey!

19 Chi je soldados ajcxy huoippy Jesús ma ycohuajc mïd paxy, e huindzuj jïptzujcixy ooy, e huingoxtinay'ahuïygixy janch ypaad nej jihuïy ooy huindzigïygixy. 20 Co je soldados ajcxy nixiictay yajxiictay Jesús, chi ajcxy jeeni je yreyhuit color ucypí, e yajñijeny ajcxy yci'm yhuit jadüg'oc. Chi ajcxy Jesús mïdcajppidzimy co anajty yajcruutzpedaangixy.

Co Jesús yajcruutzpejti

21 Tü'am ajcxy tüg jäy mïdnaybati, hue' anajty yxii, Simón, ycojájpity jim Cirene, Alejandro etz Rufo je' anajty yteedy. Hue' anajty choñ camjoty. Chi ajcxy adzip nimay Simón co huen jaccajpi Jesús ycruudz.

22 Chi ajcxy yajnicxy Jesús ma tüg it lugar huídibi yxii Gólgota, je ayuc Gólgota jadu'n yhuimbizimy o'cpi cohuajc. 23 Chi ajcxy moy Jesús vino huen ügy tem huídity mïd mirra tzoy. Per ca' Jesús cöbijcy je vino nï. 24 Chi ajcxy yajcruutzpejty Jesús. E huin'it je soldados ajcxy suerte ijxy, co anajty ajcxy Jesús yhuit yajhuäcxaani, oc'ixaangixy pin anajty ocjé'ájtíp.

25 Petyxii anajty co ajcxy yajcruutzpejty Jesús.

26 Je ayuc huídibi ajcxy yjaay ma Jesús cruudz, jadu'n ymíñañ:

—Je judíojäy ajcxy yRey. ²⁷ Quipxy miid Jesús ajcxy yajcruutzpejty metz meetzpi. Tüg meetzpi ajcxy yajcruutzpejty a'oy'amy ma Jesús ymijc, e jadüg anajty'amy. ²⁸ Yajcuyduñ nej anajty jaybety miñ ma Dios ñecy, ma jadu'n ymínañ: “Yaj'amíchoomujc je Cristo miid je pocyjäy ajcxy.”

²⁹⁻³⁰ Je mayjäy huídibi ajcxy naxiïyb anajty ma Jesús yajpaady cruutzcíxy, ooy anajty ajcxy ycöjigíyñ, nixiicy yajxiicy ajcxy Jesús, ymínañ ajcxy:

—Bah, miich huídibi Dios ytijc mjidaanip, e co-dugíg xii huingbi myajpidíga'ñ, miich ci'm cham naygohuaani, e minac cruutzcíxy.

³¹⁻³² Nañ jadu'n je teedy ajcxy mijtungmiidpi etz je escribas ajcxy nixiicy yajxiicy ajcxy Jesús ñayñimayi miñ xyipy:

—Jada Jesús ti cohua'ñ jacjadyii jäy, e ca' jaty nej ci'm ñaygohua'níy. Pen janch, co jada Jesús yjéjty je Cristo huídibi rey'adamb ma yi judíojäy ajcxy, ymiid ixypy mic'ajt jaydéb ci'm yminagípy cruutzcíxy. Co jadu'n ixypy n'íjxim co ci'm ti yminacy cruutzcíxy, huin'it mibíjxim co janch jada jéjty je Cristo huídibi rey'ajtp ma yi Israel jäy.

Nañ jadu'n je metz meetzpi ajcxy huídibi cruutzpejt quipxy miid Jesús nixiicy yajxiicy ajcxy je Jesús.

Co Jesús y'ögy

³³ Co ycuicxiijíy, chi ycoodziygíday tüg'óciy naaxhuiñ. E jadu'n je naaxhuiñ y'ijty coodzixti minacyxií. ³⁴ Minacyxií Jesús mic ymínañ miid aramaico ayuc:

—Eloi, Eloi, ¿lama sabactani? —yi jadu'mbi ayuc hue' yhuimbidzimy: Tat Dios. Tat Dios. ¿Na'amy co ti xy'ix'ixyich?

³⁵ Nijëjity jäy huidibi anajty jim yajpatp huington ma Jesús, co midoo jadu'n ajcxy Jesús y'ayuc, chi ajcxy ymínañ:

—Midoogix, Elías yi' yaaxtaayb.

³⁶ Chi nidügti ajcxy ninicxy Jesús poyigy, ti anajty yajxoogy pixy mid vinoní ta'mbi, e yajjijpxodziy je pixy ma tüg paxy, e jadu'n yajja'ty je vino ní ta'mbi ma Jesús y'ahuac, huen muucip je vino ní ta'mbi. Co jadu'n tuñ, chi ymínañ:

—Tzoc oc'ahuixim pen mimb Elías, e miñ yajminagyii ma yi cruudz.

³⁷ Chi Jesús mic ycapxqueegy, chi y'o'cy. ³⁸ Co Jesús y'o'cy, chi je mapxhuit yciitzhua'cxy tinä'amy huidibi anajty mid y'adiydútyity je Dios ycuarto ma je teedy mijtungmidpi ytigy tüg tecypajc jimijt jimijt. ³⁹ Je soldado huindzin huidibi anajty tinaayb ma Jesús yhuinduu, co jadu'n midoy nej Jesús mic yaaxqueegy, e ijxy nej y'ögy, chi ymínañ:

—Janch co jadayaabi yëydijc anajty Dios ung'adyii.

⁴⁰ Nañ jim anajty nijëjity töxyjäydijc ymij'íxcixy jiguëgy. Jim anajty yajpaady María Magdalena, etz je jadügpí María, Jacobo je mutz'anägnip ytaj, etz José ytaj. Nañ jim anajty yajpaady Salomé.

⁴¹ Jadayaabi töxyjäy ajcxy midhuidijt Jesús, e ti anajty pubéjtcixy taabi anajty Jesús yajpaady jim Galilea ñaaxjot. Nañ jadu'n anajty jim yajpaady jacnaagity töxyjäydijc ajcxy huidibi anajty ti ycoody jim Jerusalén quipxy mid Jesús.

Jesús yajnaaxtig'iyi

42-43 Paady co chu'iyñi hue' anajty viernes mina judíojäy ñayyajpocyñihuáatzigixy, jaydëb anajty amay'adaangixy je sábado xii je com jabom. Chi José huídibi anajty cogajp Arimatea yjotmictuñ, chi ytig'iy ma je gobernador Pilato, pijctzooy may'ajt co yajnaaxtig'ihuaani Jesús ñin'icx. E hue' je' José anajty tungm'iid ma yi judíojäy ajcxy. José yjijp'ijxpy anajty mina Dios pidäga'ñ yi' y'ané'min ya naaxhuiñ. 44 Pilato ooy tzachhuinmay co Jesús tim mic'amy ti y'ögy anajty, paady huodzooy je soldado huindzin, e tiy'ajt pijctzooy pen janch co Jesús ti anajty y'ögy. 45 Co je soldado huindzin tiy'ajt yejcy co Jesús ti anajty y'ögy, chi nimay José co huen yajnaxtig'ihuipy Jesús. 46 Chi José juy poob huit, e co yajminajcy Jesús ñin'icx, chi mo'ñ m'iid je poob huit, e chi pidacy ma tüg tzaajut huídibi anajty ti yajtzejtztüdy ti yajpadüdy ma tüg tzaahuingueetz. E chi yaj'adujcy je öcpi jut m'iid tüg mij tzaa. 47 E je metzpi töxyjäy María Magdalena etz je jadügp'i María huídibi José ytaj'ajtpy huind'icxp anajty ajcxy co Jesús ñaaxtig'iy.

16

Jesús yjugypijcy jadüg'oc

1 Com jabom jopy, domingo, chi je tug'ig töxyjäy ajcxy María Magdalena, María Jacobo ytaj etz Salomé juy ajcxy tzoy huídibi ooy oy xuugy, pidägaangixy anajty ma Jesús ñin'icx. 2 Je tug'igpi töxyjäy chooñ domingo, seamaan ixtigi', tim jopyñi. Ti anajty ypidzimni je xii co ajcxy oyjady ma je öcpi

jut. ³ Chi je tugigpi töxyjäy ajcxy nayñimaayi miñ xyipy:

—¿Pin xy'ocpubéjtim jigihuiipy je mij tzaa huídibi mïd agiiyity je öcpi jut?

⁴ Per co ajcxy ijxy je öcpi jut, chi ajcxy ijxy ahuingujc je mij tzaa anajty ytiguejcnäy huídibi je öcpi jut anajty agiiydujcp. ⁵ Chi ajcxy ytigiiy jutjoty. E chi ajcxy ijxy tüg yeeg'anäg iñäy anajty a'oy'amy ma je' ajcxy. E je yeeg'anäg poob huit anajty ymïd. Co ajcxy jadu'n ijxy je yeeg'anäg jii by jutjoty, chi je töxyjäy ajcxy ooy chigiiy. ⁶ Chi je yeeg'anäg nimay je töxyjäy ajcxy:

—Ca' ooy mdzigiiygixy. Miich ajcxy je' m'ijxtaaygixp je Jesús huídibi cogajp Nazaret, je huídibi jäy ajcxy yajcruutzpejt. Ti je' yjugypicy. Ca' je' ya. Oc'ijxcix ya ma ajcxy pidaacci. ⁷ Níxcix, nimaaygix Pedro etz yi jacjadyii Jesús ydiscípulos ajcxy co Jesús nícxip jayijp jim Galilea, e jim Galilea ñaybadiiyb ajcxy mïd Jesús, jadu'n nej ajcxy ñimaayi jayijp'aty.

⁸ Chi je töxyjäy ajcxy jim yqueegy ma je öcpi jut, com ti anajty ooy chigiiygixy. Ooy anajty ajcxy chiyuy mïd tzig'iñ. E ni ca' ajcxy nimay ni pin nej anajty ti ijxcixy, com ooy anajty chigiiygixy.

Jesús ñaygue'xici ma María Magdalena

⁹ Je domingo, semana ixtigi', co Jesús yjugypicy, chi ñayguëxici jayijp ma María Magdalena, je' je' je töxyjäy huídibi anajty Jesús ti yajpidzimi huixtujc ca'oybi ma yjot yhuinma'ñ. ¹⁰ Chi María Magdalena ñicxy ma Jesús ydiscípulos ajcxy huídibi mïd yhuídijty, e nimaaygixy nej anajty yi' ti ixy Jesús co ti yjugypicy jadüg'oc. E Jesús ydiscípulos

ajcxy ooy anajty ytájycixy ymáygixy etz yaaxcixy.
 11 E co ajcxy midoohui je María y'ayuc, co anajty ti
 ixyc Jesús juugy, chi ca' ajcxy mijpidaaci y'ayuc.

Jesús nayguëxici ma metz ydiscípulos

12 Co hueeñi, Jesús ñayguëxici nañ jadu'n ma
 metz je' ydiscípulos huidibi ñicxp anajty ajcxy
 camjoty. 13 Chi je metzpi discípulos ñicxy ajcxy
 mic'amy oy nimaaygixy je jacjadyii discípulos
 ajcxy co ti íjxcixy Jesús. E je jacjadyii discípulos ca'
 ajcxy mijpidaaci je metzpi discípulos y'ayuc.

Huidi Jesús ydiscípulos yajnibijc

14 Jac com jecy, Jesús ñayguëxici ma je majtügpi
 discípulos ajcxy ma anajty y'ñaaygixy ma caydac.
 Chi Jesús ogy ajcxy co ca' ajcxy mibijccixy co ooy
 ajcxy yjot yjuuñity, ca' ajcxy mijpidägy jacjadyii
 pin anajty ti y'íjxcixy Jesús. 15 Jesús je' ydiscípulos
 ajcxy nimay:

—Níxcix miich ajcxy ma tüg'ócicy naaxhuiñyäjy,
 ma tüg'ócicy naax cajp, e capxhuäcxcix ajcxy
 je oybi ayuc nej jäy ajcxy jëb y'almanidzögipy.

16 Pinjaty mibijc etz ñibejtccixy, ypaadip ajcxy
 y'almanidzoocin. Per, pinjaty ca' mijpidägy tiy'ajt
 hue' ajcxy y'alma tigoyip müd ypocy ycixpi.

17 Yi jäy ajcxy huidibi mibijcp, ooy ajcxy ijxpejt
 túngixipy. Müd ich nxii ich nmic'ajt yajpidzimipy
 ajcxy ca'oybi ma jäy ajcxy yjot yhuinma'ñ. Nañ
 jadu'n ycápxgixipy huingbi ayuc. 18 Ymadzipy
 ajcxy tza'ñ, e ca' nej yjájtcixipy. E co ajcxy veneno
 ügip, ca' ajcxy ypa'mdunib. E co ajcxy cñixájipy
 pa'mjäy, tzögip je pa'mjäy.

Jesús ypätigiyñi tzajpjoty

19 E co je Huindzin Jesús ycapxy ycijxy mïid je' ydiscípulos ajcxy, chi ypätig#yñi tzajpjoty. Jiiby tzajpjoty Jesús yajpaady ma Dios ymijc a'oy'amy, mïid mij'ane'min. 20 Chi Jesús ydiscípulos ajcxy chooñ ñícxcixy cajp cajp capxhuäcxy ajcxy Jesús y'ayuc ma nidüg'óciy naax cajp. E je Huindzin Jesús ooy ajcxy ypubejti ypudig#iyi, mic'ajt moy je' ajcxy mïid je ijxpejt je mijhuinma'ñ huídibi ajcxy tumyb. Jadu'ñyi jadu'n. Amén.

El Nuevo Testamento en mixe de Coatlán **New Testament in Mixe, Coatlán (MX:mco:Mixe,** **Coatlán)**

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 21 Feb 2024 from source files
dated 29 Jan 2022

4190de74-18ab-52cf-ba4e-5f99ab05892f